

東  
華  
續  
錄

東華續錄

乾隆一百十五

臣王先謙敬編

臣周潤蕃恭校

乾隆五十七年壬子春正月壬申諭朕仰蒙 皇祖 皇考復得元孫親見七  
代一堂誕膺多福因思朕逮事 皇祖 皇考復得元孫親見七  
代實爲古今罕有前曾降旨令八旗都統步軍統領順天府府尹  
及各直省督撫詳查臣民中如有曾親身上見祖父下逮元孫有  
指證者據實奏聞候朕優加恩賚茲當歲筭開韶元正肇慶節據  
內務府正白旗查有致仕上駟院卿李質穎並據馮光熊奏忻州  
監生張克用趙鉅解州民人陳徵舜交城縣民人武魚河江蘭奏  
濟甯州原任雲南布政使李承鄴朱珪奏欽縣捐職府知事潘起  
煌均係上事祖父下逮元孫確有指證並飭取系圖冊結咨部等

語李質穎等年踰耄耄或曾列卿僚或安居部屋親見七代五世  
同堂實爲昇平盛事著加恩賞給七葉衍祥扁額字樣令該部及  
各該督撫製造頒給用昭壽宇同登斂時錫福之盛嗣後遇有續  
行奏到者該部卽照例彙題一體頒賞扁額○丙子諭前因廓爾  
喀侵擾後藏派令鄂輝成德巴忠前往辦理巴忠自恃御前侍衛  
率意專擅欲圖草率完事且因通曉唐古特語言輒向噶布倫丹  
津班珠爾等私自計議與廓爾喀說和令其退回侵占之聶拉木  
濟隴宗喀三處每歲議給元寶三百箇作爲地租嗣因丹津班珠  
爾以事已完畢未照前議給銀致廓爾喀復行滋擾去年起事之  
時巴忠自知罪重卽投河自盡若其身尙在必當正法今已倖免  
刑誅伊子蒙古奏事處三等侍衛僧額布著降爲藍翎侍衛在大  
門上行走以示懲儆○丙戌諭據鄂輝奏舒濂染患痢疾身故舒

廉甫經到藏旋卽病故殊堪憫惜著加恩賞銀五百兩辦理喪事  
仍交該部查照副都統應得卹典照例辦理○甲午以蘇凌阿爲  
刑部尙書諾穆親爲倉場侍郎由理藩院侍郎遷○己亥轉德明爲吏部  
左侍郎調穆精阿爲吏部右侍郎轉玉德爲刑部左侍郎以伊齡  
阿爲刑部右侍郎由內務府大臣遷○轉佛住爲理藩院左侍郎以博興  
爲理藩院右侍郎由副都統遷

二月壬寅諭上年鄂輝成德帶兵前赴衛藏邊界一帶勦捕廓爾  
喀賊匪途次行走濡遲未能迅速節經降旨嚴飭並將該二員交  
部嚴處嗣經該部議將鄂輝成德照溺職例革職具題朕以其見  
俱帶兵將部本交軍機處存記以觀後效本日據成德奏帶領將  
備兵丁行抵拍甲嶺督率滿漢屯土弁兵會同進攻並拋擲火彈  
將賊匪燒斃甚多官兵分投殲戮殺賊二百餘名生擒七名見將

屯聚之賊四面拏卡攻圍等語是成德此次帶兵進剿其從前行走遲延固有應得之咎但一抵拍甲嶺卽能督率弁兵奮勇剿殺痛殲賊匪並生擒活口尙爲出力所有成德從前革職處分著加恩寬免○甲辰 上御經筵○改山西河東鹽課歸入地丁○丁巳諭軍機大臣等福康安自正月初二日摺報後久未接到到藏奏報正切懸念茲據奏到藏交界後一路並無阻滯隨行人眾行走俱屬平甯所遇風雪瘴癘地方並無疾病此皆仰賴 上天默佑欣慰之餘益深慶感至所奏接准鄂輝咨會兩次與賊接仗得勝惟恐濟隴絨轄兩處賊匪乘閒竄回飛咨鄂輝等相機堵截將濟隴絨轄兩處賊人歸路先爲斷絕並先派巴圖魯侍衛等馳赴聶拉木以資調派福康安辦理數日卽起程前往俟會集各兵再行剋期大舉仍偵探賊勢一有可乘之機卽行隨時酌辦各節於

籌辦機宜已得窺要看來事機極爲順利福康安抵藏後將應行查辦事件趕緊辦理自卽行起程目下諒已早抵聶拉木邊界卽日統領大兵進剿惟計日以待捷音至福康安詢廓爾喀滋事緣由甚爲明晰此事起釁之由總因上次巴忠辦理錯謬許銀贖地所致是以巴忠一聞廓爾喀侵擾藏地之信卽投河自盡否則何以輕生若此節次查詢業已得其梗槩今福康安詳悉查奏情弊顯然竟與朕所料胗合可見天心垂眷先啓朕衷從此聲罪致討必蒙天佑迅奏膚功也至巴忠辦理此事見據福康安查奏巴忠過藏時達賴喇嘛亦以應行進剿爲言巴忠未經允從迨許銀和息時達賴喇嘛示以此事所辦冒昧將來必有反覆可見達賴喇嘛能識大體人尙明白其辦理錯謬之處竟係巴忠與丹津班珠爾二人主意貽誤滋釁卽班第達亦未嘗不知但且不必深問鄂

輝成德與巴忠等同辦此事且係聯銜具奏斷無不與聞之理今因伊二人見在帶兵剿賊是以罪坐巴忠一人然鄂輝成德豈得置身事外總看伊二人如何奮勉出力立功自贖耳再前因巴忠在藏並未將巴勒布廓爾喀兩處部落情形分晰奏明而保泰雅滿泰所奏亦屬含混朕不知詳悉恐巴勒布部落久爲廓爾喀兼併其在藏貿易之巴勒布人等與廓爾喀自必聯爲一氣是以降旨諭令福康安到藏留心查辦伴送驅逐今福康安傳諭巴勒布頭人令其約束在藏之巴勒布人等名安生業該頭人等俱稱巴勒布部落被廓爾喀侵占正深憤恨今聞大兵進剿我等私仇可藉此報復等語可見廓爾喀恃強恣肆人心俱不帖服見經福康安於在藏巴勒布人擇其有家室者酌加賞賚鼓勵帶往軍前以備差遣是巴勒布番眾可爲我用或令其覈探賊情作爲嚮導於

進勅更爲有益前此驅逐巴勒布貿易人等之語竟可不必提及但於善後事宜詳議可也○癸亥諭軍機大臣等據福崧奏范公塘一帶原係建築石壩嗣經琅玕以石塊易於衝失奏請停修如遇應行修築之時一體改築柴壩今自停修以來石壩多已坍塌若改築柴盤頭不特需柴甚多且石壩挑溜極爲得力見率同司道將石壩如式捐修以資捍衛等語范公塘一帶前經琅玕奏稱石壩一項係用碎石裝入木櫃排列海邊復以碎石圍繞堆護根腳旣不能排釘木樁又不能用灰漿澆灌一遇潮大之時易於潑損坍塌不若柴盤頭一項可以釘木作樁根腳堅固能耐潮水衝刷彼時朕以琅玕所奏情形尙屬近理是以照議允行今福崧又以石壩挑溜較爲得力見在壩基尙屬堅固廢棄實屬可惜仍應將柴盤頭改築石壩爲詞與琅玕所奏互異朕思柴盤頭一項鑲



築既易卽遇有潮水衝汕坍塌亦不難隨時修補而石壩以碎石堆積作基難以釘樁護腳豈能日久堅固且遇潮水衝卸石塊沈入水底無從查驗易啓工員浮冒之漸然以情理揆之柴薪爲民間日用必需之物若改築柴盤頭需柴甚多如每年壩工多費一萬柴斤民間卽缺少一萬柴斤之用柴價不無少增似非民情樂從而建築石壩則需用工料較多承辦之員藉此爲開銷浮冒地步自以石壩爲便今若以石壩柴壩二項孰爲有益之處仍令福崧酌量定議則福崧旣以修築石壩爲宜具奏豈肯自改前說是兩說皆各有理朕不能遙定大約官員喜於石工之多開銷而民間又喜於不作柴工則柴省於民間日用柴薪爲有益大槩出於此乎此事著交長麟前往查勘江蘇距浙江甚近見在該省並無應辦緊要事件卽著長麟親往杭州范公塘一帶逐細履勘體察

該處情形究竟石壩柴壩兩項孰爲得力孰爲經久秉公據實覆奏並繪圖貼說呈覽總期於塘工有裨不可稍有偏護再該處大小石壩十一座建築未久何以多有坍塌損是否從前經手塘工各員辦理不能堅實所致並著長麟一併查明具奏將此傳諭福崧知之○己巳諭軍機大臣等聶拉木官寨賊匪不過一百餘人株守一隅上年十二月二十八日卽經成德等攻剿焚燒孛卡圍困水道斷絕口食無資是該處賊匪已屬勢窮力蹙束手待斃無難立時攻克悉數殲誅而鄂輝成德止派兵圍困延至一月之久始將賊匪一百餘人用火轟斃乃奏到摺內輒視顏稱將聶拉木賊匪悉數殲除地方全行收復張大其詞並將帶兵人員臚列名單至二十三人之多懇請加恩升用賞給巴圖魯名號及花翎等項試思此處賊匪不過困守負隅爲數亦止一百餘人而勦至一月

且濟隴絨轄兩處尙有賊匪屯守安得謂之全行收復實可謂恬不知恥此處剿除一隅之賊卽欲如此優加恩典將來剿辦濟隴絨轄兩處賊匪及直抵陽布後又當如何加恩酬績耶且鄂輝成德前次奏到摺內稱侯聶拉木官寨賊匪剿除後卽赴濟隴絨轄二處進剿等語彼時卽應分派將領帶兵前往二處一體圍剿迅速殲擒方爲正辦乃計不及此直至今日將聶拉木賊匪盡行燒斃尙不卽日馳赴濟隴絨轄乘勝攻剿且摺內並未提及如何領兵前往分路剿殺竟若殲除聶拉木賊匪後已屬完事伊二人竟別無他事者然何糊塗至此又此次鄂輝成德旣將困守官寨之大頭人咱瑪達阿爾曾薩野孛獲係屬瑪木薩野之姪實爲賊中緊要之犯自應訊供具奏乃止將該頭人解送前藏交福康安審訊解京並未詳細錄供隨摺具奏是鄂輝成德皆因福康安在彼

卽意存諉卸諸事置之不辦種種錯認非止一端所有咱瑪達阿爾曾薩野著福康安略加訊問卽派委委員迅速解京其在事之官兵除陣亡受傷兵丁照例賞卹外至帶兵各員內朕閱鄂輝等奏摺惟侍衛珠爾杭阿永德阿尼雅布三人較爲奮勉著福康安傳旨獎勵各賞給大段一匹並令鄂輝成德同聽宣諭當面賞給並傳旨嚴行申飭鄂輝成德使知愧恥其創挖賊寨牆角之副土司成勒春丕勒及巴塘土兵等俱著酌量獎賞其餘鄂輝等單內所開帶兵各員並著福康安另行據實查明出力者量加獎賞具奏以示鼓勵○命侍郎和琳赴藏辦事

三月丁丑 上啓鑾謁

泰陵

泰東陵巡幸五臺山○免經過

地方本年額賦十分之三○戊寅諭軍機大臣等福康安奏附近廓爾喀之布魯克巴作木朗披楞三處部落業經檄令發兵攻賊

又西藏帕克哩邊外哲孟雄宗木等部落見與廓爾喀打仗將該二處地方奪回並諭令該部落乘勝直擄賊巢等語布魯克巴等部落既與廓爾喀不睦經福康安檄諭令其攻剿不過如治病偏方藉以牽綴賊勢原非仗其兵力爲擄穴擒渠之計卽欲用以攻剿賊匪亦必俟大兵深入賊境豫約各部落同時進攻使賊匪猝不及防方爲得力乃福康安於大兵未集之前卽檄諭前往剿殺實屬失之太早嗣後遇此等緊要軍機必當熟思審處慎之又慎至所稱帕克哩營官番眾將哲孟雄宗木收復福康安俱加獎賞等語營官番目等能將遠年被占之地大半收復尙屬奮勉著福康安傳旨再行酌量賞賚並曉諭該營官番目等大皇帝聞知爾打仗奮勇奪回廓爾喀侵占之地特再加恩賞賚俾伊等益知感奮圖報也再摺內稱屯留基拉木賊匪困守日久諒不能竄逸等

語聶拉木賊匪已據鄂輝等奏到於正月二十四日將賊匪全行  
轟斃並將拏獲活口移交福康安審訊分別辦理想福康安尚未  
接到鄂輝等咨文故有此奏據福康安訊問保泰供稱許銀說合  
之事我到藏時原有所聞等語保泰等既早有所聞且賊匪所寄  
稟內復提及此事乃保泰等竟敢徇隱不奏節經降旨將保泰雅  
滿泰二人枷責示儆今據福康安奏請將保泰再行重責四十板  
另製重枷枷號所辦甚是雅滿泰與保泰厥罪維均早有旨將伊  
押回前藏並著照保泰之例再行枷責以示炯戒再保泰之名與  
裕親王相同裕親王係近支尊屬自宜敬避從前納穆扎爾旺扎  
爾皆所知悉乃並未更改以致損福罹罪見已改名爲倂習渾以  
後遇有詢伊事件卽以此名書寫○辛巳 上謁 泰陵 泰東  
陵○甲申諭軍機大臣等福康安統領大兵勦辦廓爾喀賊匪特

授爲將軍與外省駐防將軍體制稱謂相同究覺等威莫辨此次  
福康安應稱爲大將軍遇有檄諭行文等事竟以大將軍列銜更  
覺威嚴尊重足使番衆生畏賊匪破膽○己丑諭軍機大臣等前  
據福崧奏范公塘一帶原係建築石壩嗣經琅玕以石塊易於衝  
失奏請停修如遇應行修築之時一體改築柴壩自停修以來石  
壩已多坍塌若改築柴盤頭一項不特需柴甚多且石壩挑溜極  
爲得力見將石壩如式捐修一摺因查從前琅玕所奏內稱石壩  
一項係用碎石裝入木櫃排列海邊復以碎石圍繞堆護根腳既  
不排釘木椿又不能用灰漿澆灌一遇潮大之時易於潑損坍塌  
不若柴盤頭可以釘木作椿能耐潮水衝刷等語朕以兩說皆各  
有理但建築石壩易滋工員浮冒之弊而改用柴工又虞民間日  
用柴薪或致缺少是石壩柴壩兩項究竟孰爲得力孰爲經久之

處未能遙定因令長麟前赴范公塘一帶履勘體察情形秉公據實覆奏茲據長麟奏稱石壩係沈船載石爲基體重根牢卽遇風潮洶湧不過頂上木櫃及浮置碎石衝損斷不能搖動壩基若改作柴工一遇風排浪湧拔椿走埽漂蕩全無似應仍用石壩等語范公塘一帶大小石壩已閱多年見在壩基依然穩固止須略爲修補卽可收事半功倍之效若改用柴工偶遇風潮卽屬易於汕刷而基址尙存碎石釘椿下埽又復難以施工况每年多費柴薪於小民日用之需亦多未便是柴工不如石工之堅固經久有益於民顯而易見從前琅玕有何所見而率爲改用柴工之奏輕議更張且改用柴壩後亦應卽爲修理加意保護以資捍衛何以並未補修以致壩工見有坍塌之事著傳諭琅玕令將從前何以請改柴工又何以並不修理之處據實明白回奏長齡福松原摺俱



著鈔寄閱看○庚寅免五臺縣本年錢糧十分之五大同朔平二府屬未完逋賦○辛卯 上駐蹕五臺山○壬辰諭成都將軍奎林秉性肫誠持躬端謹久經行陣爲國宣勞實爲奮勇出力上年以廓爾喀滋擾衛藏特授奎林爲參贊命其馳赴藏地會同福康安等帶兵剿捕賊匪昨據孫士毅奏稱奎林行至江卡地方因頭患熱癰精神委頓當經降旨慰諭令其在江卡地方安心調攝不必過於焦急並賞給荷包奶餅用示眷注冀其速痊茲據孫士毅奏於江卡身故聞之深爲悼惜奎林雖係因病身故究屬歿於王事著加恩賞給銀二千兩辦理喪事伊子崇倫見已馳抵江卡卽令沿途照料入城治喪仍著入祀賢良祠所有應得卹典該部察例具奏○丙申 上同鑾○諭朕昨日駐蹕臺麓寺行宮因北垣外並未設堆撥亦未傳籌將管理行營之前鋒統領護軍統領及

總理行營事務之王大臣等分別議處以示懲戒矣朕辦事五十  
餘年加恩累庶天下太平卽朕夤夜獨行亦復何虞獨是眾多臣  
僕隨君出狩竟不設堆撥不行傳籌有是理乎將來子孫亦或有  
巡幸各處者凡駐蹕之處牆垣周圍不設堆撥不行傳籌必致舊  
制廢弛不成事體著每次行圍時令總理行營事務處及護軍統  
領等務將此旨宣示一次○丁酉諭朕覽國史傅宏烈列傳載其  
一生忠烈事實甚堪嘉獎傅宏烈任廣陽府知府時卽豫知吳三  
桂蓄謀不軌首先訐告及巡撫粵西正值吳三桂倡亂之時 聖  
祖仁皇帝授爲撫蠻滅寇大將軍傅宏烈親統官兵恢復梧潯等  
處屢奏捷功勞績懋著嗣又密疏尙之信種種逆謀請削其藩封  
分其兵柄陳詞剴切備極忠誠後爲吳三桂逆黨馬承蔭所紿劫  
往貴陽抗節不屈罵賊捐軀蒙 聖祖仁皇帝優卹賜諡並准祠

祀桂林 世宗憲皇帝復敕入祀昭忠祠以褒忠盡朕披閱傳內所列事蹟嘉其志節良用憫焉傅宏烈著再入祀賢良祠並令江西巡撫查明傅宏烈後嗣有無官職見執何業據實具奏以副朕篤念盡臣至意

夏四月辛丑諭軍機大臣等糧運爲軍營首務臺站烏拉最關緊要經福康安與達賴喇嘛濟囉呼圖克圖等札商使各站俱有受雇牛隻照例給價到站卽行可期無誤但必統理得人應付更爲妥協已有旨令惠齡領兵剿賊不必再回前藏其一切藏務令和琳妥爲經理和琳此次馳驛赴藏行走迅速約計閏四月內可以抵藏所有此項臺站烏拉等事著交和琳督率統理可資得力至請將川省備調兵三千名派令來藏廓爾喀賊匪旣侵占鄰近部落三十餘處地方不小我兵乘勝窮追之時後路愈長撥兵接續

以防賊人抄截已降旨令孫士毅卽將前次備調川兵三千名迅速派撥催促帶兵將弁刻日起程赴藏矣藏內見備糧食已足一萬五六千人一年有餘口糧此時藏內原有兵丁及派調續調屯土各兵並索倫達呼爾兵統計共有萬餘今再加以添調川省兵三千名亦不過一萬三千餘名糧石儘有敷餘著福康安等再行酌量如大兵深入賊境後賊匪聞風逃竄自應乘勝窮追若兵力尙不敷追剿或於川省兵丁及屯練降番內就近再行添調三四千名亦不爲多福康安可一面飛咨孫士毅檄調一面遇便奏聞以期膚功迅奏或先將此續調之三千名竟行帶往進剿再酌量就近調撥三四千名以爲後路接續聲援亦無不可福康安旣經朕委以軍旅重寄全仗伊調遣主持不必拘泥請旨以致往返稽遲又據奏附近廓爾喀之哲孟雄宗木作木郎布魯克巴披楞等

部落前經福康安檄諭令其發兵擊賊爲我先驅今仍各守地界  
逗遛不進等語此事據福康安奏到時朕卽以辦理失之太早節  
經降旨飭諭今福康安察看各部落情形大率觀望遲疑莫能先  
發各處番兵恐不能恃以集事果不出朕之所料此等附近廓爾  
喀各部落素被賊匪欺陵若見大兵進擄巢穴聲勢壯盛自必乘  
賊匪窮蹙協力攻勦藉以報復私讐乃福康安於大兵尙未齊集  
之時檄諭各部落發兵協勦則該部落等誰肯先與賊匪爲難其  
觀望不前心持兩端自係必然之理節降諭旨甚明福康安何始  
終未見及此耶至賊匪見在情形雖已併吞三十餘部落但從來  
用兵之道惟在攻擄腹心得其要領則此外皆望風瓦解不難一  
舉蕩平卽厯觀前代戡定區宇亦不過扼據形勢於要隘地方併  
力攻取其餘皆可傳檄而定斷無賊匪有數十部落卽須各部落

處處派兵進剿之理福康安等惟當厚集兵力直趨陽布賊巢使賊人失其所據此外各部落自必紛紛瓦解一舉集事總在福康安堅持定見激勵將士鼓勇直前生擒首惡固不可存輕視賊匪之心尤不可因賊匪併吞部落較多稍涉遲疑或致餒我士氣也又據奏上年賊匪滋擾扎什倫布時各喇嘛俱已逃散賊匪一至廟內瑪木薩野卽在班禪額爾德尼靜房內居住大小頭人分據各處將廟內物件及塔上鑲嵌肆行劫掠金銀佛像搶去大半間有被毀者賊匪在扎什倫布如此肆行作踐其造孽甚重自必速取滅亡而瑪木薩野一犯尤爲可惡必須與巴都爾薩野沙瑪爾巴一併生擒方足以快人心而申國憲至鄂輝成德前於二月初五日拜發之摺內稱成德將聶拉木各卡隘分兵防守後卽行前往宗喀進剿濟隴賊匪計成德發摺之期迄今已及兩月卽謂屢

遇大雪早已春融雪化自應早抵濟甯率兵進剿究竟於何時行抵該處作何剿賊情形總未據成德奏報從前進剿聶拉木賊匪時成德鄧輝先後到彼進剿攻圍已及一月而廓爾喀並未添派賊匪前來接應是賊匪境內並無驛站偵探其怯懦無能之狀已可槩見今濟甯賊匪株守一隅坐待殲戮自屬易於辦理成德先抵該處自應帶領官兵奮勇直前悉數剿殺卽或力有不能計福康安等此時已可早抵濟甯統率勁旅會合攻圍先將該處賊匪殄滅淨盡壯我軍威俾賊匪聞風膽落定計直搗賊巢迅速成功佇盼捷音之至將此傳諭福康安海蘭察惠齡和琳鄂輝成德知之○甲辰 上詣 河神廟行禮○閏渚沱河○丁未 上詣 帝堯廟行禮○命截留南漕六十萬石備直隸河南賑○戊申諭軍機大臣等福康安奏見在兵力未齊俟前調各兵及索倫達呼

爾勁旅全數到來再行統領進剿一摺已於摺內詳悉批示矣福康安等發摺時各處續調之兵尙未到齊自難輕進亦止可暫爲停待惟所稱濟隴以內擦木地方及濟隴以外熱索橋一道爲通往賊境要路廓爾喀已分派賊匪在兩處防守又於絨轄地方添派賊匪數百名前來在營官寨外砌卡據守等語此則鄂輝成德二人遷延觀望不卽前赴濟隴攻剿所致若鄂輝成德於收復聶拉木後乘勝速往濟隴絨轄趁賊匪猝不及備之時將二處屯留之賊奮力圍剿此時早已廓清邊境專事攻取賊巢乃二人於聶拉木後乘勝速往鄂輝藉催糧爲名繞回拉子成德復以聶拉木擊卡爲詞逗遛不進遲至兩月有餘是明予賊以暇俾知攻破聶拉木之信於濟隴絨轄兩處添派賊匪接應復砌築礮卡以爲負隅死守之計鄂輝成德之罪實無可辭已節次降旨令福康安等



查明伊二人是否有意逗遛據實具奏並交福康安俟事竣後再行請旨覈辦計此旨到時續調屯土各兵及索倫達呼爾兵俱已接續到藏卽前日添調川兵亦將次可到得此生力勁兵會剿邊境株守賊匪勢如摧朽拉枯是此時在邊界略爲停待轉屬以遲爲速之機惟望福康安海蘭察等於剿滅濟隴絨轄兩處賊後統領大兵直擣巢穴蕩平賊境剋日以待捷音之至耳又據奏詢問跟隨嚴廷良之通事趙璉等供稱嚴廷良前赴陽布時曾與巴都爾薩野說及爾等若能恭順噶布倫所許銀兩亦必照數付給等語此事前閱保泰給拉特納巴都爾檄諭內有嚴廷良說王子甚明白懂得道理之語朕卽知嚴廷良與廓爾喀情分甚爲熟習其許銀贖地一節該都司早經詳悉底蘊乃始終隱飾其罪實不可追已降旨將嚴廷良革職拔去花翎留於軍營作爲兵丁效力贖

罪今福康安等所詢通事情形嚴廷良實係知情隱飾自應遵照前旨辦理亦不值再行究詢矣○甲寅 上還京師○乙卯 上詣 黑龍潭祈雨○命刑部清理庶獄減徒以下罪○丁巳諭軍機大臣等朕閱本日奏到藏地圖據自以濟隴爲進兵正路將來大舉入竟可由此一路併力全攻軍勢更爲壯盛似無須分作兩路且福康安亦必須海蘭察一同領兵更爲得力若令海蘭察另領一路則福康安處未免聲勢較單或遇緊要之時海蘭察未能策應轉屬於事無益卽令惠齡同海蘭察作爲一路惠齡資分較淺於緊要機宜亦難參與朕再四思維莫若福康安海蘭察惠齡同在一路統領大兵竟由濟隴直前進剿自當勢成破竹成德人雖屢疏但伊曾任將軍提督經歷戎行且聶拉木地方究係成德克復福康安於濟隴剿除賊匪後統兵入其聶拉木濟隴一

帶或慮賊匪抄截不可不豫爲堵禦應卽令成德台斐英阿在彼處一帶率兵分駐往來策應以壯聲援更爲萬安至所奏酌議糧運事宜其糶粃一項炒磨工價不敷懇照鄂輝原奏按數支給及增定布達拉至脅噶爾程站各款止係細事此時惟當督率官兵奮力進剿迅速蒞功卽軍行經費向有定則格於成例或難准行朕亦必特降諭旨俯從所請豈有令進兵而不與兵不與糧之理福康安等總以剿捕賊匪力圖進取爲要務不必存惜費之見也

○辛酉以趙佑爲左副都御史

由大理寺卿遷

○丁卯諭前日御史曹錫

齡奏京畿得雨未能霑足請將法司問擬立決之案除情罪重大者照例辦理外其餘命盜案件內按律問擬卽應處決之犯暫停題奏一摺已經降旨飭行第思禁屠祈雨原期感召天和若於祈雨之齋戒日期及致祭之本日亦照常進立決本實不足以昭誠

敬是其奏原有一半可行查向例凡遇祈雨齋戒日期刑部並不  
停進立決本章卽本月二十一日係齋戒祈雨之期刑部亦會主  
進所辦誠屬未協此事阿桂未免因老年重聽不能領會遂相沿  
舊例辦理而軍機大臣於朕降旨時都未奏及朕一時忽略當引  
以爲咎朕於臣工功過權衡至當豈肯令軍機大臣噤噤迴護嗣  
後凡遇祈禱雨澤之前一日及祭日此二日所有刑部應請立決  
之本俱著停止進呈以速感孚而昭誠敬著爲令○免河南通省  
歷年逋賦

閏四月癸酉命京城設廠平糶○乙亥諭軍機大臣等前此福康  
安奏到檄諭賊匪附近各部落併力剿賊一節朕卽以爲辦理太  
早今據奏作木朗哲孟雄宗木各部落俱各觀望不進而布魯克  
巴回覆之稟以番兵分布各隘口見存兵力有限難以再派出征

亦不免心懷畏怯此係自然之勢廓爾喀附近各部落雖平日被賊匪欺陵伊等若見我兵乘勝深入自必紛紛響應藉以報復私讐搶還侵地今大兵尙未進剿各該部落或慮誑誘伊等與賊接仗而官兵儻如前次不進將來必受賊匪荼毒且伊等兵力本屬有限誰肯先與賊匪爲難福康安等惟當俟大兵齊集將濟隴屯聚賊匪一鼓殲擒卽乘兵威壯盛直搗陽布賊巢其時附近各部落等自必聞風響應可成破竹之勢見在濟隴賊匪諒非勁敵福康安等帶領如許生力勁兵鼓勇進攻斷無不破之理自應先得此地再圖進取方爲正辦至繞道截其歸路徑取賊巢之計究非穩著該處山路叢雜萬一我兵首尾不能相顧關係非輕節經降旨甚明想福康安等接奉後自必熟籌盡善先將濟隴賊匪剿戮淨盡再行統兵深入併力攻搗賊巢一舉集事其絨轄一路賊匪

無多卽遵照前旨派令台斐英阿幫同成德帶兵二三千名分投  
前往儘足以資撲滅又據奏丹津班珠爾之妻卽係沙瑪爾巴姪  
女恐有勾結情事此最應留心前此丹津班珠爾赴邊界講和卽  
係賊匪指名令伊前往定議甫經到彼卽被裏去安知非沙瑪爾  
巴與丹津班珠爾勾連一氣作成圈套否則丹津班珠爾隨帶多  
人何至被伊誑騙裏去且丹津班珠爾上次向廓爾喀許銀和息  
並非丹津班珠爾自出己貲卽此次攜帶銀兩前往備用皆係達  
賴喇嘛商上之物伊從中說合見雖羈留賊地將來事定仍可坐  
享厚貲故屢次所寄稟帖大率爲賊匪緩頰卽其家信內曾有被  
賊羈留受苦懇其父用銀贖回之語自係仍用達賴喇嘛商上銀  
兩看來此事全係丹津班珠爾與沙瑪爾巴互相勾結狼狽爲奸  
亟應加意防範雖據福康安等奏訪知丹津班珠爾及其父班第

達平日辦事不公番民嘖有煩言斷不至爲其煽惑但丹津班珠爾與沙瑪爾巴旣屬姻戚且久居賊中居心狡詐將來拏獲時略加訊問卽於巴圖魯侍衛章京內慎選妥員迅速解京務宜晝夜嚴密防守不可令與伊父班第達及家屬見面私通信息此爲最要至福康安前此奏請添兵三千後又有旨令孫士毅再備兵三千聽候調用其應否需調之處並著福康安酌量行止○甲申諭軍機大臣等福康安等奏聶拉木濟龍絨轄等處賊匪添人拒守分據要隘福康安等進兵時擬先於聶拉木等處酌派巴圖魯侍衛等帶兵前往作爲偏師福康安等會合大兵由濟龍直入攻剿等語所辦俱好賊匪等雖據守要隘抵死抗拒諒非効敵福康安等帶領生力勁兵鼓勇先登無難立時攻破而聶拉木一帶又有巴圖魯侍衛等分路進攻使賊匪腹背受敵顧此失彼自必望風

膽落不攻自潰再據奏廓爾喀尙有舊居巢穴在陽布之西大兵進攻陽布時先行截其歸路要隘止須於濟隴聶拉木定結第哩朗古等處派員留兵與番兵協同防守已可杜其抄截之路等語所辦已得其要惟思大兵進剿陽布時聲威壯盛賊匪自必併力死守冀圖延喘該處係屬賊巢且有城垣碉寨若賊匪悉力固守自較聶拉木爲甚我兵徒恃圍困轉致稽延時日自不若於攻圍時將其城門故留一面示之以隙使其乘間逃遁我兵先於隱僻處所潛設埋伏趁賊匪逃竄之時出其不意乘機掩擊實爲事半功倍朕又思賊匪在濟隴一帶屯聚近復添人拒守其所資口食自須由賊巢運送卽將來圍困陽布其糧石自必由他處齎運若能酌派官兵繞出賊後絕其餉道或將其水道一併斷絕俾賊人困於饑渴束手待斃此亦制勝之一策再我兵進剿糧運關繫緊



要節據福康安等奏見辦糧石牛羊等項足資萬餘人年餘之食但止係籠統計算其濟隴以內本係藏地自可按程運送源源接濟至濟隴以外至陽布賊巢及官兵跟蹤進剿處所軍行糧隨其如何籌辦運送之處總未據福康安等分晰具奏雖大兵進剿原可因糧於賊但究不可恃卽兵丁裹糧而往豈能多帶且兵丁等俱係步行各有攜帶軍械火藥及衣裝等項已屬累重若再令裹帶口糧每兵所帶至多不過一月之食軍糧爲眾兵托命設接濟稍有稽遲兵丁或以枵腹爲虞眾心卽不免觀望亟應先事豫籌方可有備無患所有濟隴以內糧運烏拉等事節經降旨令和琳在藏督辦鄂輝往來梭織催查但伊二人所辦同係一事斷不可稍分畛域致滋推諉務須互相商酌彼此關照兩人共事如同一人若和琳在藏駐紮時鄂輝卽至沿途催查趨運如鄂輝回至前

藏和琳卽赴後藏至濟噠一帶督率催宣總期軍糧轉運迅速無誤至濟噠以外鞭長莫及非伊二人經理所能周到今思惠齡本係參贊固應同將軍等統兵督剿但惠齡運籌調度自不如福康安而衝鋒打仗亦不若海蘭察自當用其所長所有濟噠以外及大兵所到地方需用軍糧竟著惠齡專辦不必同福康安等帶兵前進伊身爲參贊又係本省總督一切呼應較靈惠齡應酌量情形或設法滾運或於適中處所儲備應用俟福康安知照隨時運送如福康安等在賊境獲有糧食或尙不敷用應需若干卽可照數陸續運往以資接濟惟在惠齡熟籌妥辦俾無缺乏但軍糧關係緊要恐惠齡一人照料難周著福康安於巴圖魯侍衛章京內如額勒登保者酌派二員並派綠營兵三五百名留彼隨同防護更爲妥善將來大功告竣惠齡轉輸之功卽與戰勝之功無異朕

必與福康安海蘭察一同加恩並不因伊未曾督戰稍存歧視惟自濟隴以外設有缺誤則惟惠齡是問該督務須酌籌盡善俾軍食有資方爲不負委任○諭孫士毅奏打箭爐至前藏道里遼遠軍儲等項未能剋期迅速見帶領幹員親赴察木多駐紮督辦此時福康安等正在集兵進剿糧運軍儲最爲喫緊朕正爲繫念今孫士毅移駐察木多親身督辦呼應既靈而承辦之員亦可隨時稟商聽候調度一切糧餉等項更可迅速趨行事事應手孫士毅不辭勞瘁實心經理殊屬可嘉著仍賞戴雙眼花翎並賞大小荷包以示優眷口外地方烏拉等項俱係各該處土司出派受雇非內地民夫可比若過於嚴緊或致躲避不前轉有遲誤務在寬猛得宜善爲招集想孫士毅自能辦理協宜俾土民等聞風爭赴踊躍趨事也至軍行需用糧餉等項由川省至察木多有孫士毅在

彼督辦自可不至遲誤其自察木多以西由前後藏至濟隴以內  
地方昨已有旨令鄂輝和琳無分畛域彼此輪往照料伊二人務  
宜遵照昨降諭旨同心合力經理妥善今孫士毅駐紮察木多相  
去較近一切更可知會商辦又據孫士毅奏請將道員王啓焜留  
駐打箭爐責成經理等語王啓焜經孫士毅委辦出口各事務甚  
爲出力自應留駐打箭爐俾資照料並著加恩賞戴花翎用示鼓  
勵其先派往之道員林儁及所奏徐長發經孫士毅派在口外總  
理臺站該員等是否實能出力著孫士毅察看如果辦事奮勉卽  
傳旨一體賞戴花翎俾其益加鼓勵○庚寅諭河東鹽務從前撥  
商承辦徒滋地方官勒索之弊商力屢形疲乏是以議將鹽課改  
歸地丁以期利歸於下商民交便但立法之初朕尙慮未能立時  
奏效乃自改定章程以來晉省業已行之有驗而河南陝西二省

行銷河東引鹽地方節經穆和蘭奏承恩奏稱鹽價日減商民俱  
獲利益茲又據馮光熊奏見在該省鹽池產鹽旺盛兩三月內發  
販鹽數較往年多至加倍有餘等語是鹽課改歸地丁一事效驗  
甚速竟可永遠遵行商民均資利賴矣此議實蔣兆奎所倡朕不  
掩人之善是以自甘肅調彼至山西俾身任其事今果始終承辦  
已著成效甚屬可嘉蔣兆奎著加恩賞戴花翎以示獎勵○丙申  
諭京師自春徂夏總未獲沛甘霖朕晝夜焦勞無時或釋去冬因  
雪澤較稀卽於春閒齋心祈禱而入夏以後望澤尤殷屢經敬謹  
籲求仍未能卽施渥霑展轉思維求所以不能感召之由而不可  
得至於夜不成寐昨本欲於二十八日御門聽政時召見大學士  
九卿等面加諮詢交相循省今早適恭閱 聖祖實錄康熙二十  
一年六月亦因天氣炎旱曾令九卿科道會議彼時九卿等奏請

清理庶獄而親祈之禮未及舉行見在恤刑一事朕不待九卿奏請早經降旨並截漕緩徵平糶煮賑等事無不次第加恩且朕曾於黑龍潭覺生寺拈香敬禱又令皇子等分詣行禮凡所以祈求甘澤者已無不備至因思乾隆二十四年京城亢旱六月初旬尙未得雨朕於十一日舉行大雩禮躬親步禱旋沛醴膏但維時朕年甫四旬有餘力能步行今春秋八十有二矣雖精神尙能如舊而步履未免稍艱卽在宮內行走天色稍暗間或需人扶掖若必勉強步禱足力不支儻偶愆儀節轉不足以昭愬誠如本日召見諸臣內尙書常青年甫八十精力素稱強健乃因脆聆諭旨爲時未久竟至頭目眩暈須人掖出况朕年高於常青乎且朕雖未行大雩之禮而於設壇祈禱分遣皇子等恭詣行禮時朕每日夙興必於宮中升香天神地祇前默禱偶見雲氣往來

必望空叩祝是朕雖未步禱而爲民祈澤之誠實不敢一刻稍懈  
乃至 三壇禮竣 昊貺未昭夙夜焦思撫躬自省或緣政治有  
所缺失以致未能感迓祥和但自古政治之失無如女謁宦寺權  
臣外戚諸大端見在宮中如嬪四五人皆已年老且不能備位至  
於女樂自卽位以來卽不用其餘給使女子合之皇子皇孫等乳  
媼使婢統計不滿二百人爲從來宮闈所未有至本朝闈寺止供  
灑掃之役從不敢干與政事近因約束更嚴稍有微愆卽加斥責  
而伊等亦自覺愚蠢卽尋常使令尙形竭蹶豈復能營私舞弊是  
以願充太監者日少富差竟致乏人若云權臣專政則更無其事  
朕乾綱獨攬太阿從不下移况見在內外大臣俱朕親加擢用不  
特不敢如前明之嚴嵩輩盜竊威柄朋比爲奸卽本朝康熙年間  
明珠徐乾學等私相交結少通餽遺雍正年間及朕乾隆十年以

前鄂爾泰張廷玉等素知謹慎尙不免稍存門戶之見此時諸臣中亦無一略似彼二人者以言外戚則觀音保爲孝聖憲皇后之姪在散秩大臣上行走十有餘年甫得簡用副都統爵位亦不爲崇若傅恆福康安之晉封公爵俱因底定金川及剿平臺灣等處逆匪懋著勞績用示酬庸並非因傅恆福康安爲孝賢皇后之弟姪特加恩寵卽明瑞奎林明亮皆皇后之姪俱以躬列戎行爲國家宣力而明瑞又係歿於王事此等得力大臣豈必因身係外戚轉棄而不用乎其餘如興修工作等事朕早自以爲過然俱動用內府帑餘從無絲毫累及閭閻並以工代賑俾小民均資利益且近十餘年來亦未嘗復舉大工是朕之用人行政天下臣民所共聞共見者因復思目前重務惟有進剿廓爾喀一事外聞或有議及不應勞師動眾以致雨澤愆期者殊不知廓爾喀係



徵外小番前此因與唐古特人等鹽稅細故侵擾後藏邊界彼時  
派令巴忠鄂輝成德等前往剖斷賊匪卽畏懼乞降此次賊匪復  
因帳目未清又來滋擾經駐藏大臣具奏時朕僅令鄂輝成德帶  
兵往諭原不過示以兵威使之悔罪乞降不敢再萌他念卽可完  
事而已及巴忠聞信自戕始疑從前辦理錯誤而賊匪等竟敢擾  
至扎什倫布肆行搶劫若不痛加殲戮賊匪無所忌憚勢必爲得  
尺則尺之計漸至侵及前藏卽察木多巴塘裏塘一帶亦必受其  
煽惑日久漸成邊患且此時僅以和息了事將來大兵撤後儻賊  
匪復來滋事後藏距川省遼遠鞭長莫及斷無屢勞兵力遠涉勦  
辦之理是以特命福康安海蘭察等統兵前往聲罪致討無非爲  
綏靖邊圉保護衛藏起見朕臨御以來拓土開疆膚功屢奏以廓  
爾喀之蕞爾彈丸不及回準二部兩金川緬甸安南百分之一豈

屑利其土地而爲此勞師動衆之舉此朕不得已用兵之苦心又  
宜爲天下臣民所共諒者或此卽窮兵黷武乎朕反復推求終莫  
能得致旱之故但甘澤未施總由朕躬不能感格豈此自省無缺  
之一念卽不免爲滿盈之累遂致恆暘示儆耶此意朕每日召見  
軍機大臣未嘗不再三垂問卽大學士九卿閒日召對時均殷殷  
面詢令其據實直陳而諸臣等僉稱並無闕失大臣等俱受朕澤  
恩於此等關繫民瘼重務經朕虛懷訪詢豈忍復事諱飾第天  
恩未降究由人事未孚是以本日於御門聽政畢復召見皇子皇  
孫及大學士九卿等交相咨儆務求致旱之由益加省惕皇子等  
皆當 北郊大祭齋居並派皇孫大臣等分詣 黑龍潭 覺生  
寺齋宿籲禱仍令皇子等輪日前往拈香此時將屆夏至若能速  
霽恩膏趕緊播種大田秋收尙屬可望著大學士九卿等傳集科

道公同諮議如果確有所見卽據實合詞陳奏以副朕遇災戒懼側身修省之意○丁酉大雨

五月辛丑諭軍機大臣會同禮部議覆安南國王阮光平請定貢期方物一摺所稱從前舊例該國三年一貢者定爲兩年六年遣使來朝一次者定爲四年等語著依議行至呈進方物內金銀器二項係沿照舊例定議但任土作貢原視物產所宜况此次新定該國貢期已較前稍密足以表該國王親敬之心其舊例金銀器著毋庸呈進卽此外沈香等物若未能備數不妨就該國所有如土紬絹布均可進奉不必拘定成例所謂不惟其物惟其意也該國王尙其仰體朕心欽承無斁以副朕格外體恤至意○甲辰諭向來親王郡王以下府第俱有定制載在會典惟門首應否設立行馬下馬椿及高下寬窄遠近之處並未開載但行馬下馬椿爲

規制攸關會典未有明條難以遵循亦應明立限制以示等威以後親王固倫公主郡王和碩公主及貝勒門首俱准設立行馬下馬椿貝子以下不得僭用其尺寸高下寬窄距府第遠近若干應如何分別等差著宗人府會同步軍統領衙門詳議章程具奏至諸王園居惟彩霞園曾經 皇祖駐蹕是以門外建蓋東西相向朝房二座自應仍存其舊此外諸王公主之園居俱不准建蓋朝房以示限制其親郡王子孫以次降封至貝子以下者其舊居府第規制俱無庸更改惟行馬及下馬椿應照定制撤去不得僭用並交宗人府存記遵照尋議親王固倫公主郡王和碩公主及貝勒門首俱應設立行馬下馬椿其親王固倫公主之下馬椿應高一丈郡王和碩公主之下馬椿應高九尺貝勒之下馬椿應高八尺其行馬親王固倫公主應安設八架郡王和碩公主應安設六

架貝勒應安設四架每架以五尺爲率從之○賞山東德州等十州縣衛貧民一月口糧○丁未 上啓鑿秋獮木蘭○免經過地方本年額賦十分之五○戊申召馮光熊來京以長麟爲山西巡撫奇豐額爲江蘇巡撫○己酉調張誠基爲江蘇布政使以陸有仁爲直隸布政使阿彰阿爲山東按察使由廣東肇羅道遷○壬子以陝西太白山禱雨輒應列入祀典○癸丑 上詣熱河 文廟行禮 上駐蹕避暑山莊○丙辰賞和琳都統銜

六月丙子諭軍機大臣等據福康安等奏官兵攻克擦木要隘全殲賊眾情形一摺首戰得勝實賴 上天之恩欣慰之餘倍深欽感擦木地方兩山夾峙中亘山梁賊匪據險拒守拚死抵禦經福康安海蘭察惠齡等乘陰雨縣密連夜發兵將弁官兵等鼓勇先登奪獲礮座將賊眾全行殲戮實爲奮勇爭先勤勞倍至覽奏殊

爲心惻已另降諭旨將福康安等及帶兵將弁並出力兵丁等分別優加賞賚以示獎勵至福康安等於攻克擦木後卽乘勝直趨濟隴其聶拉木一路已遣成德帶兵作爲偏師牽綴賊勢並於緘轄要口留兵一千名派諸神保帶領防守我兵後路無虞賊匪抄截所辦俱妥總之初次打仗卽獲全勝大挫賊鋒賊匪自必聞風膽落事機極爲順利見乘軍威勝勢直趨濟隴定可剋期摧破將賊匪剿戮無遺肅清邊境卽行合兵深入進剿賊巢自必勢如破竹惟計日以待捷音續報也○丁丑諭福康安等奏行至瑪噶爾轄爾甲山梁殲戮賊匪一摺覽奏欣慰此皆仰賴 上天恩佑連次打仗再戰再捷士氣倍奮賊匪望風膽落該處距濟隴不遠看此事機順利乘勢直前自已將濟隴立時攻克捷報當已在途一得此處軍威大振自必迎刃而解福康安惟當倍加勉力迅奏膚

功至此次賊匪經官兵追壓尙敢拌命力撲實屬可惡福康安等以賊勢潑猛先於石礮砌下埋伏故留一路誘賊上山帶領官兵橫衝賊隊痛加勦殺將賊匪三百餘人殲擒殆盡於行軍勦賊機宜深中窾要昨因福康安等初仗得勝業經優加賞賚此次打仗督率將弁調度有方福康安著再賞給鍍金盒伽南手串一挂並大小荷包鼻煙四瓶用昭優眷海蘭察與賊交戰馬匹受傷幸未顛蹶實賴上天護佑爲之額手虔謝特賞給行幸常佩護身佛一尊以爲諸事吉祥佳兆海蘭察臨陣勇往是其素性但身爲參贊所關甚重以後接仗時固當督率士卒鼓銳直前然究宜加意持重不可輕於冒險此必當遵朕訓諭也又巴圖魯三等侍衛定西鼐胸前得有槍傷幸係穿過護身佛龕槍子未能打入該侍衛打仗出力甚屬可嘉並著升爲二等侍衛以示獎勵所有此次領

兵侍衛章京等人數較多著福康安等將在山半橫衝賊隊奮力  
截殺者詳細查明如已經給有巴圖魯名號者著卽咨部議敘其  
未經給有巴圖魯名號者著開單進呈候朕加恩賞給所有受傷  
陣亡兵丁俱著查明照陣亡例咨部賞卹至福康安等奏此次追  
剿賊匪因侍衛章京等馬匹疲乏儘力馳驅僅能趕及追奔十餘  
里等語該侍衛章京等所乘馬匹因牧飼不時已形疲乏復經登  
山陟險馬力不及以致追剿賊匪不能得力事所固然但賊匪俱  
係步行奔竄我兵若因馬乏轉爲所累莫若亦令捨馬徒步跟蹤  
追剿爲是索倫兵最爲勇健或遇馳陟山險非其所長至屯練兵  
丁素性趨捷令其徒步馳逐自可收追剿之用並著福康安等相  
機籌辦○戊寅諭歸景照奏參革知縣嚴承夏於五月三十日晚  
押解到省因時值深夜暫委按察使照磨張克謙看守飭於次早



收禁不料嚴承夏卽於是夜自縊身死請將照磨張克謙革職拏問署按察使事杭嘉湖道良柱革職一併嚴審並自請交部等語嚴承夏係因署守備林鳳鳴等聽從賄屬幫爭網地放槍滋事一案匿不稟報特旨拏問之員一經解到卽應嚴禁所稱令照磨看守竟是虛語致令自縊實出情理之外省城重地以拏問官犯輒任自盡此而不嚴加懲創設有大員拏問亦復徇情寬縱與以自戕之暇尙復成何事體張克謙著革職拏問交與福崧提同看守人役將有無徇情受賄之處嚴審定擬具奏良柱著革職審明後發往軍臺效力贖罪至歸景照不過一循分供職之員因念其係尙書歸宣光之子不次加恩擢用藩司見護撫篆又近在同城乃於此等拏問官犯並不留心查察委蛇取譽致有畏罪自盡之事其罪實無可追歸景照亦著革職發往軍臺效力贖罪福崧並無

緊要必須面奏事件冒昧起程來京陛見轉置地方於不問釀成重案殊屬非是福崧卽著交部嚴加議處○調王懿德爲浙江布政使鄭源璫爲湖南布政使以吳璫爲河南布政使陳文緯爲河南按察使

由河北道遷

○己卯諭福康安等統領大兵攻克濟甯痛殲

賊眾一千餘人所有帶兵將領人員奮勇出力甚屬可嘉其受槍陣亡之參將長春著加恩照副將陣亡之例議卹至火器營委署護軍參領額勒謹護軍連春皆係因病留於前藏力疾告請隨往軍營今在中途病故甚爲奮勉可憫亦著加恩照陣亡例議卹○丙辛巳姚棻丁憂調陳淮爲江西巡撫以馮光熊爲貴州巡撫○丙戌諭軍機大臣等福康安等奏攻克熱索橋進臨賊境一摺覽奏欣慰濟甯以外高山夾峙窄徑崎嶇較金川尤爲險阻賊匪恃險拒守放槍抵禦福康安等抵熱索橋時因與賊相持急切不能得

手隨暫撤各兵繞越兩重大山在熱索橋上流潛渡乘其不備直前攻撲痛殲賊匪奪據石卡所辦深合機宜可嘉之至該處爲賊境門戶今已乘勝攻克統兵深入勢如破竹自早直搗賊巢著賞給福康安洋表一箇御用大荷包一對小荷包四箇海蘭察洋表一箇大荷包一對小荷包二箇惠齡洋表一箇大荷包一對小荷包二箇用昭優眷並發去翎管十箇大小荷包各十對交與福康安等查明遇有帶兵出力侍衛章京將領等酌量賞給所有此次帶兵繞河殺賊之巴圖魯侍衛等實屬奮勇出力除阿滿泰已於上次打仗得勝加恩以副都統卽補外前升頭等侍衛之翁果爾海頭等侍衛哲森保俱著賞給副都統職銜墨爾根保著升爲二等侍衛兵丁等亦著查明共有幾人一體加賞以示獎勵其攀援獨木偏橋前進之兵丁如有跌斃者亦著查明咨部照陣亡例議

卹至成德岱森保等前經福康安等派往聶拉木一路牽綴賊勢  
今經福康安等行知令其酌量進攻卽於十二日分路前進占佳  
德親鼎山攻克頭卡槍斃賊匪多人將二卡三卡俱行攻克焚毀  
木棚搭橋前進亦屬奮勇可嘉並著福康安等查奏打仗出力者  
酌加獎賞以示鼓勵至官兵連次克捷鼓銳長驅賊匪自己望風  
膽落但用兵之道計出萬全於屢勝之後自宜加意慎重所有進  
兵後路亦不可不豫籌防範成德岱森保等見已山聶拉木進至  
木薩橋攻勦賊匪自己會合大兵直抵陽布固屬甚善若尙在途  
次進攻應卽令成德等於聶拉木一路前趨陽布於中間總匯處  
所帶兵堵禦以爲大兵後路聲援儻彼處無路可通則前次所謂  
後起之德爾格爾等兵尙未能迅抵軍營應卽於巴圖魯侍衛中  
遣回二人令其與帶兵之袁國璜帶領在大兵後路濟隴以外要

隘處所酌量屯駐防守以資聲援策應更爲周密再福康安等前  
此進呈之圖止有濟隴以內著福康安於大功告成後將濟隴至  
陽布山川地名及險要形勢官兵打仗克捷處所詳繪一圖貼說  
呈覽○癸巳諭翁方綱奏科試情形一摺內稱考試士子經解默  
經時卻於坊閒所刪經題內出題其有未讀全經者槩不錄取等  
語五經爲聖賢垂教之書士子有志進取竟有未經全讀者可見  
士習之荒疏卑靡翁方綱身任學政自應認真董率俾承學之士  
全讀經義身體而力行之方不負訓迪之責如詩書內不祥諱用  
語句不便出題乃後世過於迴避之陋習朕所不取茲公然竟有  
刪去者豈不可鄙是亦學術式微之一大證也經籍俱係孔子刪  
定豈容更復妄有刪節今該學政明知坊閒刪經之不可而不能  
去不過調停其閒且相沿陋習形之奏章若爲定例者然殊屬非

是著傳旨申飭蓋各省坊間射利之徒往往於經書內避去不祥  
諱用語句擅行刪節標寫擬題以爲習場屋者揣摩之具而躁進  
之士子遂以爲捷徑祕傳最爲惡習山東一省如此各省富亦不  
免而各督撫學臣知而不言則更翕方網之不如矣朕甚愧之此  
事於士風大有關繫不可不明爲查禁著通諭各督撫及學政等  
務須實心查察嚴行禁止俾士各通經文風振作其應如何立法  
查禁以端士習之處著軍機會同禮部妥議具奏○乙未命京城  
附郭增設五廠煮賑○丙申諭富綱等奏請敕賜廠神封號一摺  
近年各廠辦獲銅斤較每年額數多至四百餘萬自屬山靈呈瑞  
理宜列在祀典錫之封號用答神庥著封爲裕源興寶礦脈龍神  
並著該督撫於廠地相度處所建設總廟春秋致祭並交該部載  
入祀典其大小各廠聽其自行立祠其神牌祠額卽照所定封號

一律繕寫○諭福康安等奏攻克協布嚕一帶木城賊寨打仗得勝情形一摺官兵自過熱索橋後所經地方陡巖高礪亂石叢接無平地可以搭營福康安等與所帶官兵至於露宿實甚勞苦至不忍觀其協布嚕一帶極爲險要賊匪憑河阻抗撤橋固守福康安等復設法出奇乘其不意於雨夜迅速潛渡將賊匪痛加殲戮焚毀卡寨巴圖魯侍衛官兵等俱爭先用命於人迹不到之處攀援登陟衣履皆穿手足胼胝並未稍形退卻用兵以來從無似此之難者欣覽之餘益加憐憫官兵深入賊境連次克捷福康安等調度督率悉合機宜今賞福康安御用大小荷包四喜搬指鑲嵌松石翎管用昭優眷外發去四喜搬指六箇鑲嵌松石翎管十七箇著福康安等酌量帶兵大員內如台斐英阿等何人最爲出力者傳旨

分賞又鼻煙壺小刀各四十件著福康安等遇有帶兵出力之侍衛章京將領等的數賞給以示獎勵見在大兵深入賊境濟隴以外糧運等項最關緊要屢降諭旨令惠齡無須帶兵竟回至濟隴適中地方設法趲運今惠齡接奉初次所降諭旨已回至濟隴一帶往來查催實力趲運實屬可嘉朕初不料惠齡能權事理緩急輕重若此本日據福康安等奏藏內運送事宜經和琳盡心辦理近已疏通所有糧餉火藥等項後藏有鄂輝在彼催趲自已源源運至濟隴惠齡務宜倍加奮勉隨到隨運迅送軍營接濟以副委任



東華續錄

乾隆一百十六

臣王先謙敬編

臣周潤蕃恭校

秋七月庚子諭軍機大臣等尹壯圖前因逞臆妄言自取重戾經朕加恩寬免復行錄用伊亦何顏尙思升擢且其母已年逾七十遠在萬里雖伊戀職忘親攜妾在京居住不以定省爲念但朕以孝治天下不可不曲加體恤著留京王大臣卽傳尹壯圖面加詢問如伊不願回籍亦聽其在京供職儻情願回家侍奉卽准其開缺歸養以示朕教孝矜全格外推恩至意○辛亥諭此次福康安海蘭察自第哩朗古宗喀進兵屢次克捷收復濟隴攻克熱索橋深入賊境捷音踵至今又由協布魯進攻東覺山梁並雅爾賽拉博爾東拉等處將賊匪營寨木城碉卡全行政攻克痛殲賊眾擣穴

擒渠成功在即該處林深箐密路徑險峻福康安等帶領官兵冒雨步戰手足胼胝實屬奮勇出力可嘉之至除此次出力之將領等交福康安等查明具奏另行升賞外福康安海蘭察俱著交部議敘又據福康安奏此次帶領打仗巴圖魯侍衛翁果爾海哲森保納丹保鄂尼保富永等俱受有槍傷等語翁果爾海哲森保均於前次打仗得勝賞給副都統職銜恩無可加此次哲森保受傷較重著賞銀一百兩翁果爾海受傷較輕著賞銀五十兩其中槍之三等侍衛納丹保鄂尼保俱著升爲二等侍衛藍翎侍衛富永著升爲三等侍衛以示鼓勵所有打仗陣亡之索倫佐領多爾濟四川都司伊魯爾圖俱著交部照例議卹其官弁兵丁等打仗傷亡者仍著福康安等查明咨部照例賞卹○諭軍機大臣等福康安等奏進攻東覺山梁並雅爾賽拉博爾東拉等處將賊匪營寨

木城碉卡全行攻克痛殲賊眾覽奏深爲嘉慰各兵登山陟險打仗追賊晝夜辛勤已至八日自應暫予休息再行前進此次福康安等於萬難攻剿之處竟獲全勝皆賴上天眷佑感謝之誠不能言喻而福康安等董率調度悉合機宜以及將弁兵丁勞苦之狀可嘉竟不忍復視除降旨先將福康安海蘭察交部議敘外著加賞福康安御用大荷包一對小荷包四箇海蘭察大荷包一對小荷包二箇用示優眷另發去鼻煙壺小刀著福康安查明帶兵出力之巴圖魯侍衛章京分別賞給仍擇其實在奮勉者開單具奏候朕賞給巴圖魯名號並予升擢其餘出力官兵皆交部議敘統俟大功告竣再降諭旨又據奏成德等攻克扎木鐵索橋等處已令嚴守要隘量力前進等語連日因福康安等未經續報情形恐後路或無策應賊匪開出侵擾今福康安等於成德一路

尙指示防守要隘必無代成德籌防後路而轉自致疏虞之理況  
同日據惠齡奏於協布魯熱索橋等處添安背夫並由協布魯直  
至濟龍往來查催益見後路之毫無阻梗朕心爲之欣慰又據福  
康安奏入賊境後卽聞沙瑪爾巴業伏冥誅訊之見獲賊目巴載  
巴拉哩亦供稱沙瑪爾巴於五月十五日病斃等語此次廓爾喀  
滋事皆由沙瑪爾巴唆使實爲此案罪魁或係廓爾喀見大兵連  
捷危亡在卽託言該犯已伏冥誅希圖卸罪否則該犯詭計多端  
豫爲揚言使官兵接捕稍寬乘閒遠颺均未可定著福康安訪查  
的確並將此次拏獲賊目係何兵弁查明具奏量加獎賞又據和  
琳奏哲孟雄稟請派兵並求賞項隨酌賞頭人銀牌段匹茶葉等  
物令堅守寨落等語大兵連獲勝仗賊匪喪膽不藉哲孟雄兵力  
牽制賊勢和琳所見甚當此必該部落意存觀望如官兵蕩平賊

境伊卽居功否則藉口兵少豫爲推諉地步今經和琳嚴詞飭諭此等伎倆各該部落俱所不免著傳諭福康安等如有似此請兵求賞者當照和琳嚴詞拒絕酌賞段匹等物和琳辦理此事得中孰要著賞給大荷包一對小荷包二箇孫士毅惠齡往來查催糧運均爲出力著各賞給大小荷包以示嘉獎○癸丑諭軍機大臣等鄂輝奏沿途查催軍火糧石情形一摺據稱見由上蟒卡木一帶迎催定日一路之糧由定日馳往聶拉木督辦糧運軍火接濟成德一路等語所見極是成德等見帶兵深入後路兵糧軍火關係緊要而濟隴以外有惠齡駐彼督辦兼有福康安等委員分段守催自可接濟無誤若鄂輝復由宗喀前往濟隴往返需時其聶拉木後路軍糧轉致輟長莫及鄂輝能不拘泥仍自宗喀轉回迎催定日一路糧運俾成德後路可資接應實屬可嘉此一舉足蓋

前愆著賞給大小荷包以示獎勵鄂輝到聶拉木後止應將成德後路妥爲安頓不可冒昧深入此時成德由聶拉木進兵已經三百餘里鄂輝即使馳往亦屬無及若在聶拉木逗遛則濟龍以外糧道雖有惠齡督辦而濟龍迤東至後藏轉致無人照料見據孫士毅奏邊壩地方向有糧石積壓鄂輝將聶拉木後路安頓後仍速回宗喀一帶督催不使停留方爲妥善又孫士毅奏辦理糧運情形各摺孫士毅自出口後親身督率相機籌辦所有糧餉火藥等項源源起運自可早抵軍營惟前此察木多以東軍需究未免停滯見在邊壩所積餉銀火藥等項務須督催速運毋任再有耽延又據奏裏塘近有夾壩運送軍儲交卸後回空烏拉往往被劫已密飭附近土練湊足二三百名同漢兵分布防範等語該處係夾壩出沒之區正當糧運絡繹不可不速拏嚴治著傳諭觀成卽

赴裏塘一帶率領土練漢兵實力接拏從重嚴辦孫士毅在邊壩催運完竣自已抵前藏與和琳會商一切事宜應速回裏塘一帶四川省城亦不可無大員彈壓觀成侯孫士毅回至裏塘卽旋成都辦事

八月辛未諭軍機大臣等福康安等奏賊首拉特納巴都爾將上年裹去之兵丁王剛第巴塘邁等送出並呈遞福康安暨官員兵等稟各一件此次賊匪齎呈稟帖僅令裹去兵丁等前來投遞稟內止妄想乞降尙未自行認罪至沙瑪爾巴咬使賊匪誘執兵丁噶布倫及搶掠後藏罪不容誅卽服毒身死已屬倖逃顯戮該犯雖無應襲封職未知藏內尙有父叔子姪否著和琳鄂輝於事竣後查明見當何差槩行斥革以紓眾憤又據奏成德一路官兵攻克多洛卡隴岡等處俟續調川兵到時酌撥一千名前往等語聶

拉木一路雖成德等帶兵進攻亦能連次克捷但利底山寨等處賊匪守禦尙堅究屬偏師牽綴未能直抵賊巢計此旨到時續調之彭承堯等所帶川兵已可早抵軍營著福康安等酌量如所撥一千兵尙未派往不如留於福康安等軍營更足以資調遣而壯聲威○壬申諭蒙古王公等奏今歲值有閏月哨內已降霜雪且過哨鹿之時請暫停進哨等語山莊氣候早涼該王公等以朕年過八旬誠心籲懇且駐蹕此處佇待紅旗捷報道路較近尙可早到數日著照所請停止進哨但隨圍人等業已遠來豫備不無需費著加恩仍照例各減半賞給卽令回京其御前乾清門行走之額駙及眾閒散蒙古王公等俟十六日在惠迪吉門瞻覲後均令各回游牧其由京前來之前鋒護軍等各營官兵亦著無庸前赴熱河以示體恤○諭前因順天府所屬蜩螗萌生經派往大臣等



分路查勘數對所奏情形當起自三河一帶梁肯堂非惟不將該縣李培榮查參轉以之請升通州知州所有三河縣缺僅令州判陳馨洲接署顯爲李培榮規避處分起見將其咎卸與微末州判以完此局本日據梁肯堂奏李培榮已先委署通州如蟲患竟起自三河自應將陳馨洲參奏等語果不出朕所料朕知梁肯堂必如此辦理早經降旨將李培榮離任其通州員缺另將景祥簡補梁肯堂身任總督乃徇庇屬員曲爲開脫處分實大不是著交部嚴加議處○諭昨因福康安等奏賊匪呈遞稟帖內稱沙瑪爾巴於五月十五日病斃恐賊匪詭詐多端藉口掩飾已有旨令福康安等留心查察如竟屬假捏務須設法生致解京盡法處治如果伏冥誅究屬倖逃顯戮藏內羊八井地方有伊舊住廟宇未便仍令紅教徒眾在彼安居著傳諭福康安等於事定後無論其病斃

與否總應將廟宇改給黃教喇嘛居住徒眾槩勒令還俗分發閩  
粵浙江江西等處安插以抒眾憤再撤遶溝紅帽喇嘛於上年賊  
匪路過時遞送哈達尤屬可惡若仍令在彼處居住恐復煽惑滋  
事莫若趁大兵撤回之便懾以軍威將該喇嘛等移至內地酌量  
安插並著福康安等一併留心酌辦○再撥漕米二十萬石備賑  
○癸酉諭福康安統領大兵勦捕廓爾喀自進兵以來督率將弁  
兵丁摧堅破險屢戰屢捷無不鼓勇爭先於調度布置一切機宜  
悉中款要且經越艱險冒雨步戰手足胼胝用兵之難爲從來所  
未有實屬奮勇出力見在大功將次告成福康安著加恩實授爲  
大學士孫士毅自署川督以來辦理一切糧運督率所屬尙屬認  
眞且伊係漢人能由察木多一帶馳赴衛藏會同和琳等籌備軍  
需俾資源源接濟甚爲出力孫士毅亦著加恩實授爲大學士和

琳自到藏後催辦糧運實心整頓設法勸懲俾該處疲玩積習日有起色昨經奏請馳赴宗喀濟隴一帶與福康安所奏適合見復奏報卽日迅赴該處趕緊催趨俾軍食接濟充裕無誤師行奮勉可嘉所有吏部滿尙書員缺著金簡調補其工部尙書員缺卽著和琳補授和琳未回京以前工部尙書事務仍著金簡兼署吏部漢尙書員缺著劉墉調補紀昀著補授禮部尙書都察院左都御史員缺著寶光補授所遺禮部侍郎員缺著劉羅雲補授○乙亥諭前因三河縣爲蝗蝻自起之處梁肯堂摺內未經將三河一路提出含混其詞不但不將該縣知縣李培榮參奏轉以之請升通州知州因降旨令其明白回奏今梁肯堂將署三河縣知縣州判陳馨洲奏請革職而於李培榮一員則仍稱於五月初十日卽經接署通州印務三河有蝗之時係在李培榮卸事之後等語是

總欲出脫此人始終迴護劣員實不可解蝸子之起向在卑溼之地多於三四月內卽行化生今年又有閏四月今李培榮係於五月初十日始行接署通州印務是蝸孽蟪生至遲亦在該員任內之事未能及早實力留心按捕淨盡以致蔓延他境已屬咎無可辭卽謂李培榮已署通州與三河無涉通州地方亦有飛蝗間蝕禾稼之處李培榮旣未據實稟報又不實力撲捕則通州之蝗李培榮又將誰諉此等情節梁肯堂豈不能見及乃仍以該員卽事爲詞再三執奏代爲開脫直欲卽過於微末州判而令李培榮得以置身局外仍獲升擢豈謂朕前可以蒙混具奏遂爾了事耶著再傳旨嚴行申飭仍令再行明白回奏毋再執迷不悟始終迴護致干重戾也李培榮著革職交刑部問罪看梁肯堂何以救之○丁丑諭前因順天各屬間有飛蝗殘蝕禾稼之處節經降旨嚴飭

梁肯堂蔣賜榮等督率所屬實力撲捕並特派大臣分路查勘覈對所奏情形蝗蝻自起之處當在薊州三河一帶復經降旨令梁肯堂蔣賜榮等確查實在起蝗處所將該州縣據實嚴參嗣據蔣賜榮等查奏蝻孽孳生係由三河所起而梁肯堂覆奏摺內含混其詞並不將三河一路提出轉請將三河縣知縣李培榮升擢通州又經降旨詢問並令該督明白回奏乃該督覆奏之摺僅將署三河縣知縣州判陳簪洲參奏革職而於李培榮則稱該員於五月內委署通州印務三河有蝗之時在該員卸事之後等語朕謂蝻孽之生多在二三四月內卽或至遲亦不出閏四月李培榮係於五月內始署通州蝻孽生時卽在該員三河任內之事乃梁肯堂欲爲該員規避處分豫調署理別州縣今又稱滿城地處衝衢事務緊要是以委令署理查滿城本係簡缺而該員三河本任轉

屬要缺今以本居要缺之員調署簡缺而轉以地衝事繁爲詞且並未會奏聞顯係有心捏飾欲蓋彌彰爲該員開脫而卸罪於微末州判以完此局此等伎倆豈能逃朕之洞鑒且卽以通州而論該處亦有飛蝗李培榮並未據實稟報實力撲捕其咎又將誰諉昨已降旨將李培榮革職交刑部治罪梁肯堂始終爲李培榮開脫欲其置身局外仍邀升擢袒護劣員冀圖蒙混了事以致簡要倒置是誠何心梁肯堂著再交部嚴加議處至蝗蝻殘蝕禾稼最爲民害惟在及早實力撲捕蝻子不至成蝗飛起方不至蔓延貽患如或地方官玩視民瘼諱匿不報及捕蝗不力之員定例褫嚴從前乾隆二三十年間經朕屢降諭旨節次嚴加懲創地方大小各官稍知儆畏留心近因並無蝗蝻二十餘年從未降旨飭詢是以地方官日久玩生遂致心存諱飾豈朕痼瘕在抱除害恤民之

意嗣後除雲貴閩粵等省向不聞有蝗外其餘各省凡有沮抑卑  
淫之區卽防蝻子化生各該督撫務嚴飭所屬每年於二三月內  
實力搜查據實稟報各省督撫等具奏一次儻復玩忽從事有心  
諱飾一經發覺必當重治其罪斷不稍爲寬貸將此通諭知之○  
庚辰諭從前普福駐藏時廓爾喀遣大頭目蘇必達多喇拉木等  
來稱拉特納巴都爾等業經封王請賞俸祿地方經普福飭駁並  
曉示天朝特封王爵並優加賞賚已屬格外施恩且見在納貢之  
國甚多從無賞給地土俸祿之例所辦尙屬得體此等關繫外藩  
之事應據實奏聞乃當時旣未入告及陛見時又未面陳實屬錯  
謬不便稍爲寬宥著博興馳往庫倫代理事務傳旨將普福革職  
拏送刑部治罪○諭軍機大臣等和琳奏行抵琅噶子接准福康  
安咨會未便轉回前藏移知孫士毅提訊俘習渾雅滿泰等語所

奏甚是看此情形宗喀濟龍一帶糧餉似未能充足是以和琳欲  
趕緊前往催辦實爲可嘉連日恐藏地驟冷若非及早蕝事撤兵  
或爲大雪所阻卽經傳諭福康安通盤籌畫昨復令軍機大臣詢  
之阿爾曾薩野及扎薩克喇嘛等據供聶拉木一路向來自九月  
至次年正二月雪大封山後卽不能走宗喀濟龍一路有繞道山  
雖險峻雪不甚大尙可繞行等語是將來撤兵卽或遇有雪霰儘  
可繞路行走想福康安等身親經歷更無難詢悉其詳又據孫士  
毅奏廓爾喀差人懇求賞給俸祿地方一節詢係普福任內之事  
經普福嚴行斥回普福告知雅滿泰又告知俘習渾雅滿福到京後  
並未奏聞亦未告知軍機大臣殊不可解已派博興馳往庫倫辦  
事卽傳旨將普福革職拏問解交刑部治罪至俘習渾雅滿泰旣  
經聞知此事亦並未奏及其昏愎糊塗更不可解俘習渾雅滿泰



著孫士毅監看重責四十板以示懲儆○辛巳諭前據福康安等奏兵丁王剛帶出丹津班珠爾等寄唐古特番目書信稱達薩爾乃爾興向伊告知上次廓爾喀差哈哩薩野進京仰蒙大皇帝施恩卽欲遣人謝恩沙瑪爾巴妄稱旣受天朝封號例應食俸或賞給地方賊酋等卽差大頭人蘇必達多喇拉木並小頭人翁瑪拉同赴前藏未經辦成等語廓爾喀賊酋聽信沙瑪爾巴妄言思欲賞給俸祿地方旣已差人前來自向駐藏大臣稟訴彼時俘習渾雅滿泰豈有遇此等緊要事件匿不具奏之理因降旨令孫士毅和琳提訊俘習渾等據實具奏並經福康安一面具奏一面咨會查明辦理昨據孫士毅奏廓爾喀於五十五年秋聞差人來藏懇求賞給俸祿地方一節其時係普福任內之事經普福嚴行斥駁普福告之雅滿泰雅滿泰又告之俘習渾等語此事前據福康安

奏到時朕以若係俘習渾雅滿泰匿不具奏其罪竟無可追今據孫士毅訊明其時駐藏大臣尙係普福當經降旨將普福革職拏問解交刑部治罪俘習渾雅滿泰知情不舉其罪尙居其次降旨令孫士毅監看再各重責四十板以示懲儆五十五年秋閒廓爾喀差人來藏懇賞俸祿地方事關撫馭邊徼最爲緊要普福旣經斥回若卽以據實入告朕必嘉其得體而於廓爾喀亦必留心另有所辦乃普福竟隱飾不奏其到京召見時亦未面陳殊不可解我國家綱紀肅清朕臨御以來凡遇大小臣工陳奏事件無不躬親綜理隨時覈辦內而大學士九卿外而督撫及新疆駐紮大臣設有縱恣貽誤一被指參無不立時懲究誰敢匿不上聞况邊隘重情尤當鉅細畢陳候朕裁奪乃普福首先隱匿俘習渾雅滿泰亦知而不舉此而不分別嚴懲何以肅政治而儆官常著將此案

辦理緣由通諭中外嗣後各直省督撫及新疆駐藏大臣遇有地方及邊隘事情均宜據實奏聞如有隱匿不行陳奏者一經發覺必當重治其罪普福等卽其前車之鑒也並著將此旨令督撫及新疆大臣各錄一通入於交代俾各觸目儆心毋蹈覆轍負朕諄切誥誡之意○丙戌諭據理藩院奏喀爾喀公銜台吉達瑪琳缺出達瑪琳並無頭等台吉之處等語此等賞銜係朕格外恩施非行陣勤勞得有錫賚者可比嗣後儻有會襲二次查明另有勞績者候朕定奪如係尋常賞銜卽著削去止令承襲本職著爲令見在達瑪琳遺缺卽照此辦理○丁亥諭軍機大臣等福康安等奏攻克噶勒拉堆補木奪橋過河打仗殺賊情形一摺據稱藏地雪下最早宗喀通拉山等處八九月閒大雪封山今年節氣較早須趕封山前藏事撤兵等語前恐藏內氣候驟冷若非及早竣事撤

兵或爲大雪所阻屢降旨令福康安等安速蕝功今福康安等已  
籌計及此朕心轉爲稍慰前福康安等遣朗穆幾爾幫哩二人回  
巢諭知賊酋將各山梁拒守賊眾全數撤回又經數日尙未撤動  
福康安等自以進攻爲是各官兵分路攻勦攀援登陟雖見有中  
槍陣亡者並不退怯仍直前拋擲火彈痛殲賊眾將噶勒拉堆補  
木石卡木城全行占奪可嘉可憫幾於不忍披閱阿滿泰墨爾根  
保等皆中槍陣亡尤堪軫惜嗣後與賊接仗所有得力之巴圖魯  
侍衛等不可復使冒險輕進致有傷損並傳諭福康安等如賊匪  
經官兵連次痛殲望風膽落必差人赴營遞稟乞降卽可趁其畏  
懼哀懇傳旨允准見爲節候所限亦不得不如此辦理至額勒登  
保珠爾杭阿德楞泰已賞給副都統銜此時帶兵乏人額勒登保  
等卽令作爲領隊又福康安等摺內台斐英阿等直前射死紅衣

賊目又稱台斐英阿及二等侍衛英貴佐領棍德衣中槍陣亡等語是否止係英貴棍德衣中槍陣亡抑係台斐英阿亦中賊槍所奏尙未明晰著福康安等據實覆奏再降諭旨其阿滿泰墨爾根保等統俟福康安等查明奏到交部賞卹又奏成德一路攻得利底大山賊卡二座前據福康安等奏成德等攻克多洛卡隴岡等處未經續奏今既將攻得利底各員保奏則該處打仗情形成德自必一併呈報何以未據奏明前經軍機大臣訊之阿爾曾薩野等據供聶拉木一路向來冬雪較大封山後不能行走等語著福康安等將成德所帶兵丁見在何處會否前進將來不至爲雪所阻之處一併查明具奏○戊子諭廓爾喀係邊外荒徼小部落從前未列職方乾隆五十三年因鹽稅銀錢細務與唐古特人等彼此爭競在後藏濟隴邊界滋擾因命鄂輝成德前往該處查辦並

以巴忠熟悉藏內情形令其馳往會辦詎巴忠以通曉番語謬執已見不爲剖斷明確又有前輩班禪之弟紅帽喇嘛沙瑪爾巴與伊兄仲巴不和廓爾喀聽其唆使致滋生事端此皆由巴忠初次辦理貽誤所致使其身尚在必當明正典刑詎伊昨年一聞廓爾喀復行滋擾之信卽畏罪自盡見已將伊子僧額布侍衛革退令在護軍上效力行走其罪亦無可再加至廓爾喀復行滋擾初據俘習渾雅滿奏到朕尙以廓爾喀向在藏內與唐古特人雜處貿易紛爭微利致有欠帳未清如僅因素欠細故擾至邊境原不值加之撻伐嗣據俘習渾等奏廓爾喀竟敢擾至扎什倫布肆行搶掠若仍付之不問弗爲聲罪致討大加懲創其何以安衛藏而靖邊疆因特命福康安等及巴圖魯侍衛帶領官兵前往進剿朕臨御五十七年平定準部回部大小兩金川拓土開疆不下二萬

餘里區區廓爾喀以後藏邊外彈丸朕豈值利其土地爲窮兵黷武之舉第以衛藏爲 皇祖 皇考戡定之地僧俗人眾沾濡醴化百有餘年詎容小醜侵擾置之不問此朕不得已用兵之苦心當爲天下臣民所共知共見者福康安等自馳抵後藏卽整兵進剿於擦木邦杏連獲勝仗以次收復濟隴攻克熱索橋協布魯東覺集木集等處所向克捷痛殲賊眾深入廓爾喀境數百餘里賊酋拉特納巴都爾及伊叔巴都爾薩野自知滅亡在卽畏懼惴伏將去年裹去之噶布倫丹津班珠爾等早行送出差大頭人朗穆幾爾幫哩等四名赴營遞稟乞降並以此次擾至後藏邊界皆由誤聽沙瑪爾巴指使本欲將該喇嘛送出適先病斃等語經福康安等嚴行駁飭令該賊酋叔姪親自赴營懇乞始准投誠本日據福康安等奏七月初八日接到拉特納巴都爾來稟所有諭令交

送扎什倫布什物並呈獻沙瑪爾巴骨殖等款俱已一一遵奉稟  
內語意多係感戴恩德自行認罪凡自稱之處俱改爲小的惟於  
親來一節止婉陳敬畏之意未敢切實稟覆等語前因廓爾喀自  
作不靖是以加之天討今既畏懼悔罪疊次遞稟乞降情詞尙爲  
恭順朕仰體 上天好生之德廓爾喀民人猶吾民人也不忍多  
事誅夷况福康安等此次帶兵進攻每戰必克賊匪望風膽落故  
以畏服之詞爲歸誠之請較之前次安南受降納款更足以尊國  
體而示軍威但外番素性多疑拉特納巴都爾等因滋擾獲罪察  
其畏懼情形目下亦未必敢親自詣營將來歸誠後見安南阮光  
平叨荷崇封進京祝嘏賞資駢蕃寵榮已極該賊酋等自必心生  
慙羨或情願詣闕覲光輸誠亦未可知著福康安等卽傳朕旨赦  
其前罪准令納表進貢悔罪投誠福康安等亦卽撤兵回至內地



此朕始終不欲用兵之苦心又當爲天下臣民所共見共聞者福康安等之摺係七月初九日拜發距今已四十餘日此旨到時或福康安等已攜穴擒渠遞紅旗亦未可定但朕怙冒爲懷覺勞師久役轉不若納款受降趁大雪封山以前撤兵凱旋之爲完善朕本欲俟福康安等紅旗遞到恭謁 東西兩陵告厥成功今已准其受降完事不值詣 陵祭告行此鉅典已定於二十五日啓鑾同京所有辦理廓爾喀緣由著通諭中外知之○諭軍機大臣等福康安等帶兵打仗所向克捷賊匪望風膽落朕料其必差人赴營乞降又慮及藏內氣候驟寒疊降旨令福康安等妥速藏事今福康安等奏俟其將合同扎什倫布物件呈交並送出沙瑪爾巴骨殖徒弟跟役看如何具稟再相機酌辦所見甚是此次官弁兵丁與賊接仗無不奮勇爭先攻奪碉卡殲戮賊匪屢戰屢捷深

入賊境數百里軍威已極壯盛賊匪具稟乞哀其情勢窮蹙已可  
槩見以見在情形而論賊匪經兵威震懾不敢再萌故智邊境救  
甯可保數十年無事趁此收功較安南投誠入覲尙爲完善卽拉  
特納巴都爾巴都爾薩野心懷畏懼不敢親赴軍門數年之後畏  
威懷德見安南內附疊受恩施自請入覲亦事理所有恐福康安  
等未奉朕旨不敢遽行受降已明降諭旨將不得已用兵之故及  
賊酋乞降俯准納款緣由宣示中外廓爾喀旣經內附或三年五  
年遣頭人赴京具表進貢如朝鮮安南暹羅緬甸外藩一律辦理  
方成體制從前來藏貿易之巴勒布人等願留藏者卽編入戶冊  
作藏內民人不願者派兵押送出境令回故土永斷葛藤藏內行  
使錢文設鑪改鑄寶藏字樣所有巴勒布銀錢不許再行使用自  
定立疆界後廓爾喀人眾固不許偷越藏界卽藏內人等亦不得

私赴廓爾喀禮塔貿易至駐藏大臣一員向俱駐紮前藏於後藏  
事務輟長莫及嗣後應分駐一員以資彈壓遇有事務就近辦理  
福康安等當會同駐藏大臣將應辦各條參酌損益妥協辦理以  
期經久遵行邊隅永臻甯謐○命福康安爲武英殿大學士兼吏  
部尙書孫士毅爲文淵閣大學士兼禮部尙書○己丑吏部議奏  
直隸總督梁肯堂於蝗蝻起自三河欲爲該縣李培榮開脫轉令  
升署通州又委署理滿城始終袒護屬員冀圖蒙混了事應請照  
例革職得旨梁肯堂著革職從寬留任仍註冊但該督袒庇劣員  
始終欲代爲開脫冀邀升擢且調署縣缺簡要倒置有小迴護非  
尋常錯誤可比其未經開復以前所有總督廉俸止准其支領一  
半以示懲儆至蔣賜棨前因捕蝗案內飾詞具奏降旨將其戶部  
應得飯銀全數停其支給今梁肯堂總督廉俸旣准半支蔣賜棨

戶部飯銀亦著准其支領一半此皆朕格外施恩梁肯堂蔣賜棻當益知愧奮倍加慎勤於地方事務實心經理毋負宥過成全之意○辛卯 上自避暑山莊回鑾○癸巳諭軍機大臣等昨已降旨令福康安等受降藏事並將善後各條令公同詳酌妥辦矣但撤兵後該處應行另定章程前旨尙有未經詳盡之處今思慮所及再爲逐條開示福康安撤兵後卽令海蘭察帶領巴圖魯侍衛章京等分起回京打仗官兵俱令歸伍會同孫士毅等將所指各款熟籌妥辦務期經久無弊一前後藏爲達賴喇嘛等駐錫之地各蒙古及番眾等前往皈依瞻拜必其化身確實方足宏衍禪宗查藏內達賴喇嘛班禪額爾德尼等呼畢勒罕示寂後令拉穆吹忠作法降神俟神附伊體指明呼畢勒罕所在乃拉穆吹忠往往受屬任意妄指以致達賴喇嘛班禪額爾德尼等親族姻婭遞相

傳襲總出一家與蒙古世職無異甚至丹津班珠爾之子亦出有  
呼圖克圖之呼畢勒罕者即仲巴與沙瑪爾巴同爲前輩班禪弟  
兄仲巴係扎什倫布商卓特巴坐享豐厚沙瑪爾巴居住廓爾喀  
未能分潤唆使賊人搶掠此呼畢勒罕不真及族屬傳襲之流弊  
也嗣後應令拉穆吹忠四人認真作法降神指出實在根基呼畢  
勒罕若干將生年月日各書一籤貯金奔巴瓶內令達賴喇嘛等  
會同駐藏大臣對眾拈定作爲呼畢勒罕不得仍前妄指私相傳  
襲一前後藏租賦向歸達賴喇嘛班禪收貯又眾蒙古平時皈依  
喜捨是以布達拉扎什倫布兩處商上蓄積饒多駐藏大臣向不  
過問其商卓特巴噶布倫等任意侵蝕各擁厚貲嗣後商卓特巴  
噶布倫等缺應聽駐藏大臣秉公揀選其收支一切亦令駐藏大  
臣綜覈凡換班官兵及駐藏大臣公用俱不得於商上出息除養

贍喇嘛番眾或有羨餘卽爲添補唐古特兵丁養贍之用一派往駐藏辦事之員多係中材謹飭伊等前往居住止圖班滿回京於藏中諸事並不與聞聽達賴喇嘛等率意徑行是駐藏大臣竟成虛設嗣後藏中諸事實成駐藏大臣管理遇有噶布倫商卓特巴第巴藏棚等缺秉公揀選奏補不得仍前任聽達賴喇嘛等專擅致滋弊端儻原設章京筆帖式等員數不敷酌量添設以資差委一查係藏內邊地一一設立鄂博毋許越界駐藏大臣按季輪往稽查並將各該處駐兵勤加操練一廓爾喀搶掠扎什倫布物件儻送出時卽稍有短絀不必過於查究仍將物件給還該喇嘛不必入官一布達拉扎什倫布兩處商上改隸駐藏大臣綜理止須代爲稽覈不可過於嚴切其達賴喇嘛班禪額爾德尼自用及公用各項仍聽其便無庸管束太迫以示體恤○丙申調玉保爲兵

部右侍郎以伯麟爲盛京兵部侍郎

由內閣學士遷

九月丁酉朔

上還京師

○己亥諭

廓爾喀滋擾衛藏肆行搶掠

命福康安等領兵進剿屢次克捷收復後藏邊界濟噶等處地方  
深入賊境痛殲賊眾賊酋畏懼震懾投稟乞降情詞懇迫因恐雨  
雪阻途特頒諭旨准其納款令福康安等撤兵凱旋矣上年賊匪  
侵擾後藏時若早爲籌辦多調官兵迅速進討並糧餉軍火各事  
宜一切豫備轉運不誤則兵多糧足似此么膺小醜無難擒穴擒  
渠今因辦理稍遲恐藏內氣候早寒致爲雪阻不得及早撤兵  
但大軍自進剿以來連獲勝仗業經收復濟噶聶拉木並攻克熱  
索橋協布魯東覺集木集等處賊匪聞風膽落悔罪乞降藏功已  
屬完善朕本擬俟福康安等直抵賊巢縛醜獻俘於大功告竣時  
備加渥賞用志酬庸茲雖未得蕩平賊境而諸將士攀越險艱手

足胼胝冒雨步戰實爲勞苦出力其帶兵將弁已經節次加恩予以升擢及賞給巴圖魯名號福康安等爲統率大臣調度布置悉協機宜亦應加以甄敘福康安著賞給一等輕車都尉卽令其子承襲海蘭察本係二等公爵著晉封一等公至孫士毅由打箭爐馳赴前藏督辦糧運和琳自到藏後催趨積滯整飭顏習均能認真督率惠齡在濟隴一帶辦理軍需亦屬奮勉並著交部議敘○諭軍機大臣等廓爾喀賊匪經此番痛殲之後屢遞稟乞降情詞恭順且藏內氣候早寒早經降旨准其撤兵感事今賊酋遵繳私立合同並沙瑪爾巴骨殖及徒弟跟役全行送出又請差辦事大頭人進奉表貢福康安自應一面具奏一面撤兵不必待其大頭人到營致需時日福康安等接奉前旨業已受降撤回藏地最爲完善若未經撤兵竟當明諭賊匪以該酋悔罪投誠業經奏聞大



皇帝奉旨准降見在邊外早寒卽日雪阻豈值因爾所遣大頭人未至軍營在此久待今撤兵回至藏內俟爾所遣大頭人到藏帶京毋得遲延時日如此曉諭賊首懾服自不敢不俯首聽命而我兵妥速旋師不爲雪阻此次征剿廓爾喀屢戰屢捷將藏地收復又直至濟隴以外深入賊境七百餘里攻克碉卡奪據山梁殲戮賊匪數千賊酋誓伏乞降經兩次駁斥額末納款並請差辦事大頭人獻表納貢此後諸弊肅清約束堅定不但廓爾喀與藏內邊界一一設立鄂博毋許擅越卽附近廓爾喀之作木朗布魯克巴哲孟雄等各部落亦當嚴諭以後槩不得私通貿易此事亦著交福康安等四人一併酌籌妥辦再孫士毅奏請俟和琳回至前藏卽前赴裏塘一帶按拏夾壩一摺裏塘夾壩已專令觀成在彼督捕孫士毅竟當在藏將一切善後事宜會同商辦其餉銀一項見

在軍務已竣自不必解運過多前因餉銀未能接續解到兵丁等應得分例未必全數得給伊等勞苦備至著福康安等詳悉查明按照各兵在營之日逐一補給以示體恤至前據福康安等奏宗喀等處糧臺多有停積其派出之道府固無可辭咎但後藏一帶糧運俱係鄂輝管理既經遲誤亦應據實具奏施恩赦過候旨定奪豈得顛預混過著福康安等一併查參至此次廓爾喀滋事後藏沙瑪爾巴挑唆起釁實爲罪魁見據賊酋將該犯骨殖送出著福康安等不必送京分懸前藏之布達拉後藏之扎什倫布並前後藏及察木多打箭爐一帶大寺廟一一懸挂並將起釁犯事緣由逐一開寫號令示眾用示儆戒○庚子諭理藩院侍郎員缺著奎舒補授特克慎著以副都統職銜前往西甯辦理青海事務見在征剿廓爾喀軍務告竣大兵凱旋經由川省並不從青海行走

該處見無緊要事件特克愼於今年春閒巡幸五臺時甫經召見且係朕素知之人著卽赴新任毋庸來京請訓所有山西按察使員缺著善泰調補成林前在廣西道員任內經福康安派往安南辦理各事宜於該處邊界及安南情形較爲熟悉所有廣西按察使員缺著成林署理俟服闋後再行實授○諭刑部奏已革三河縣知縣李培榮於蝻子初起之時旣不能先事防範見署通州於飛蝗過境又不卽時稟報若僅依律擬杖罷職不足示懲應從重擬以杖一百徒三年等語本年直隸蝻孽滋生雖起自三河李培榮先已委署滿城後調署通州其咎止在不能先事防範及於通州飛蝗過境之處並不卽時稟報乃梁肯堂於查辦蝗蝻摺內旣不將三河一路提出含混其詞不但不將該縣李培榮參奏轉以之請升通州因降旨令其明白回奏則仍稱三河有蝗之時係在

李培榮卸事之後始終有意迴護曲爲開脫是以從嚴將李培榮革職交刑部治罪看梁肯堂何以爲屬員規避處分今據刑部將李培榮問擬杖徒雖屬罪所應得但念李培榮於本年正月卽經調署滿城於三河本任早經卸事蝗孽滋生多在二三月間尙非有心玩誤李培榮於五月內署理通州時該處亦有飛蝗並未稟報其咎實無可辭李培榮著革職加恩免其治罪仍交該部帶領引見候朕再降諭旨朕於大小臣工功過惟視其人之自取從不稍爲畸輕畸重於其閒若爲上司者有意爲屬員迴護開脫則轉不得不從重辦理非曰愛之適以害之各督撫等皆以此爲戒可耳○辛丑諭伊齡阿著調補兵部左侍郎其刑部右侍郎員缺卽著明興調補明興見在出差著穆精阿兼署穆精阿年逾八十踴起維艱於刑名素爲熟悉尙可資其坐辦嗣後吏部遇有引見官

員穆精阿竟毋庸隨進帶領以示體恤○丙午諭前因廓爾喀賊匪經大兵屢次剿殺之後畏威悔罪疊行具稟乞降情詞極爲恭順已明降諭旨赦其前罪准令納表進貢並令福康安等卽行撤兵矣茲又據福康安等奏賊酋七月二十七日又差頭目塔曼薩野前赴軍營投遞稟帖繳出前次搶掠扎什倫布銀物等件並備辦馴象番馬及廓爾喀樂工一併恭進是該賊酋悔罪輸誠十分惛服且其繳出物件內金冊一項係從前頒賞班禪額爾德尼之物今賊匪於搶去後因知係天朝頒賜不敢隱匿特行檢出敬謹送到可見廓爾喀滋事起釁止因與唐古特人等爭論帳債細故並不敢干犯天朝今已差其辦事大頭人備辦方物恭齎表文一併呈進福康安等自應察其恭順納款惓忱允准所請撤兵戡事除已諭知福康安等遵照辦理外將此再行通諭知之○諭軍機

大臣等福康安等奏賊酋繳出扎什倫布物件並拏解沙瑪爾巴之番婦女喇嘛等一摺未將何日撤兵之處聲明具奏想因賊酋所遣大頭人尙未到營略爲等候計此時已詣營謁見卽派員護送進京著傳諭福康安等計算日期如能年內到京固屬甚善否則明正鐙節前趕到尙可隨朝鮮暹羅一體瞻覲至此次繳出物件因金冊係天朝頒賜班禪額爾德尼關繫緊要其貴重等件亦不敢私留又沙瑪爾巴姦占之妻策旺拉木中途逃逸賊酋卽緝獲鎖送並備象隻番馬樂工恭進看此情形實已真心懾伏悔罪輸誠邊境自可甯靖惟定立地界一事前已有旨令福康安等一設立鄂博毋許偷越見在大兵將撤宜趁此時申明約束以熟索橋迤西如協布魯雍鴉東覺堆補木帕朗古等處皆經大兵攻克本應卽以此爲後藏邊界念爾悔罪投誠仍行賞還其熟索橋

以內濟龍聶拉木宗喀等處本屬藏地雖經汝侵占見經大兵收復非如上次講和退還者可比嗣後應以濟龍聶拉木以外爲界爾部落人等不得尺寸擅越如有私行偷越者拏獲卽行正法爾部落遇有遣使進貢獻表等事當先稟明邊界將領聽候知照方許進口又據福康安奏撤迦呼圖克圖採辦糴粃五萬斤分運濟龍聶拉木運腳自捐並捐牛五百頭等語前因撤迦喇嘛於賊匪上年路過時遞送哈達曾令福康安等於撤兵後勒令改歸黃教今該呼圖克圖既有捐辦糴粃牛隻之事尙知畏法奉公此等紅教流傳日久且人戶眾多福康安等不必拘泥前旨當曉諭該喇嘛等以前此遞送哈達俱干重罪大皇帝念爾等愚昧無知不行嚴辦又因爾等捐辦糴粃牛隻急公效順本將軍業爲奏聞仍准爾等照舊焚修安業此後宜倍加感激約束徒眾安靜梵誦方可

永安樂利並交駐藏大臣嚴切約束不准仍前越界滋事免與黃  
教爭競庶爲妥善再金冊係前輩班禪進京時經朕特賞該喇嘛  
等不能協力防護爲賊搶去致煩天兵遠涉代爲剿捕賊匪因震  
懾聲威知金冊爲天朝所賜不敢銷毀茲據檢出送繳福康安等  
宜向達賴喇嘛班禪及戴綳堪布等詳諭以爾等不能保守金冊  
本有應得重罪大皇帝施恩免其究治仍將金冊賞給班禪俾在  
扎什倫布安奉嗣後宜加意保護勿得再有疏虞至後藏仲巴戴  
綳等向來惟知封殖營私因唐古特兵丁等係達賴喇嘛之人視  
爲膜外無怪賊匪滋擾兵丁等亦各不相顧福康安等宜剴切曉  
諭以唐古特兵丁既係達賴喇嘛派往伊等駐守後藏卽爲保護  
班禪而設况扎什倫布商上素稱豐裕嗣後如有贏餘務分給前  
藏兵丁等俾沾餘潤伊等自同心協力固守無虞再布達拉商上



前有旨令駐藏大臣兼管所有扎什倫布商上班禪年幼恐戴棚  
堪布等從中舞弊嗣後亦歸駐藏大臣稽覈以歸畫一昨有旨令  
孫士毅速回前藏裏塘一帶夾壩專交觀成足資料理且大兵撤  
回必經過裏塘軍威壯盛匪徒自即斂戢孫士毅竟當遵旨速回  
與福康安等會商善後諸事宜再前經降旨令達賴喇嘛等會同  
駐藏大臣將呼畢勒罕名姓並生年月日各書一籤貯金奔巴瓶  
內對眾拈定作爲呼畢勒罕是此項金瓶關繫鄭重見派御前侍  
衛惠倫乾清門侍衛阿爾塔錫第敬謹齋往並親解御佩小荷包  
二箇亦著帶往於迎見福康安海蘭察時傳旨賞給以示酬庸之  
意○巴延三因秋審失出六案解任調宜興爲盛京刑部侍郎祿  
康爲盛京戶部侍郎以德瑛爲盛京禮部侍郎由內閣學士遷○己酉定  
各省疏脫遣犯加倍處分例○壬子諭軍機大臣等此次廓爾喀

遣大頭人恭進表文呈獻方物並請定貢期五年一次表文極爲恭順懇至實係惛伏軍威傾心向化經福康安等堅明約束准其納款歸誠嚴局已爲完善但廓爾喀所遣頭人雖經福康安等面諭准降其進獻表貢之大頭人到京後回至該處尙需時日恐該酋長不免心懷疑慮福康安應先作檄諭以爾部落前蒙大皇帝恩施封爵至爲優厚此次因邊界細故肆行滋擾罪無可逭本應蕩平爾境念爾酋長畏威悔罪屢差人籲請歸誠稟繳前搶扎什倫布物件送出沙瑪爾巴骨殖徒眾又遣大頭人進獻表貢不敢仍前私立合同及停止行使廓爾喀錢文其濟隴向給鷹馬永不索取並將五輩達賴喇嘛管轄之扎木地方仍歸西藏本大將軍已據情代奏蒙大皇帝念爾誤聽沙瑪爾巴唆使未覩天朝兵威妄生蠱端仰體 上天好生之心赦爾前罪准爾納表進貢保全

合境生靈爾酋長拉特納巴都爾暨爾叔巴都爾薩野當倍加感  
畏以期永受恩施至爾酋長等前蒙得受王公封爵本當革除爾  
具奏乞哀卑辭貶損大皇帝亦赦爾罪有旨嗣後表章文稟准仍  
照繕王公封號俟所差大頭人到京大皇帝再行優賚另賜敕書  
至熱索橋以外之協布嚕東覺博爾東拉噶勒拉堆補木帕朗古  
等處俱係大兵攻克地方本應卽以此爲界今念爾悔罪投誠仍  
行賞還其聶拉木濟隴宗喀原係藏地經大兵收復非如前此講  
和退還可比嗣後不得藉詞牽涉爾歸出之扎木地方係五輩達  
賴喇嘛管轄應仍歸後藏不准再有侵越貿易一事亦照前旨停  
止俟爾貢使順道過藏憑公交易福康安務須明白曉諭於撫綏  
安輯之中仍寓堅明約束之意庶該酋長畏威懷德可保邊境枚  
甯再扎木地方應派唐古特兵駐守並遴派第巴戴棚管理卽歸

聶拉木將領兼轄將來駐藏大臣等巡邊之便一體稽查此次善後事宜節經降旨交福康安等公同商辦但福康安孫士毅事竣卽應回京惠齡亦當回四川本任一切章程全在和琳隨時辦理和琳務宜擘畫周詳事事盡善方爲無負委任再廓爾喀送出沙瑪爾巴骨殖前有旨令於前後藏及察木多一帶大寺廟懸挂號令今思藏內寺廟如布達拉扎什倫布等皆爲吉祥佛地未免喇嘛等見爲不祥竟當在前後藏及察木多一帶通衢大站地方懸挂號令俾喇嘛番眾觸目警心較爲妥善○乙卯諭前據福康安等奏廓爾喀遣大頭人進表納貢於方物之外另備馴象五隻因思此次辦理廓爾喀命福康安等統率大兵聲罪致討原爲保護衛藏起見今該部落旣悔罪輸誠願懇納貢見在京城象隻儘敷陳列儀仗之用而藏地向無象隻著傳諭福康安卽傳旨賞給達

賴喇嘛班禪額爾德尼各一隻其餘三隻緩程送京俾前後藏僧俗番眾常覩邊方貢物更足以肅觀聽而壯聲威○乙丑諭朕恭閱 聖祖仁皇帝實錄內載前任福建總督范承謨雲貴總督甘文焜遇吳三桂耿精忠二逆之變抗節不屈殉難捐軀忠藎深堪嘉憫因命查該二臣殉節後所得卹典范承謨甘文焜俱贈何書並廕一子入監此等封疆死事之臣雖非效命行間臨陣捐軀者可比但當逆豎盜兵偏隅煽燄致命遂志勁節不回實有合於成仁取義之道其身雖已仰邀贈卹而其子僅廕以入監尙不足以勵臣節而慰忠魂卽使其子孫等能承世業疊繼簪纓但所膺官秩止能及身而止而其祖父忠貞之澤究不能流傳勿替非賞延於世之義前因滿漢軍功應得世職人員襲次已完者仍賞給恩騎尉俾其子孫永遠承襲所有范承謨甘文焜子孫亦著照此例

各賞給恩騎尉世襲罔替其有見任職官者卽准其兼襲此外尙有似此殉節諸臣並令軍機大臣會同部旗查明原有世職罔替者毋庸另行賞給外其並無世職者均著一體賞給恩騎尉以爲盡臣效節者勸

冬十月丁卯以瑚圖禮岳起俱爲內閣學士

瑚圖禮由祭酒岳起由奉天府府尹遷

○戊辰諭軍機大臣等拉特納巴都爾等屢次差頭目赴營哀懇投誠進表納貢情詞俱爲恭順是以准其乞降今又差人呈送犒軍食物並求伺候福康安等直至前藏看此情形實屬真心悃伏出於至誠非特目前藏功完善並可保邊境敕甯衛藏無事至濟龐聶拉木宗喀等處向來原有唐古特兵丁駐守防禦皆因俘習渾等平時廢弛不加訓練以致怯懦無用見賊退避目下邊境旣不駐川兵藏地事宜皆係和琳責任仔肩更重所有原駐唐古特

第巴番兵務須於巡邊時勤加操練認真稽察俾去怯懦積習其應如何分撥派駐及稽察訓練之處並著悉心妥辦以期永遠遵循再前據福康安奏廓爾喀差大頭人第烏達特塔巴等齎送表貢於八月初八日到營等語其於何日自帕朗古派員伴送起程之處未據奏及或係福康安等候諭旨到日再令起程亦未可定計此旨到時福康安等早抵前藏前已有旨令福康安飛飭伴送之員於途次趲行著再傳諭福康安如該貢使業已起程在途務須飛檄委員加緊行走所有貢物除象隻馬匹本令緩程行走此外如有沈重物件亦不妨隨後送京以便貢使遄行能於年內到京俾隨朝鮮各國之後瞻仰朝儀方爲妥善卽或不能亦務令於銜節前到京以便宴賓再福康安等奏廓爾喀差出頭人稟稱欲令貢使過藏時謁見達賴喇嘛班禪額爾德尼叩頭請罪並於准

降後擬遣人赴藏呈遞哈達土物等語拉特納巴都爾欲令來使  
謁見達賴喇嘛等請罪亦足見其悔過之心至伊呈送達賴喇嘛  
等哈達土物和琳應告知達賴喇嘛等酌量收存數件勿虛其意  
仍加倍酬給回賞不可爲廓爾喀所輕再此事歲功完善御製十  
全記一篇以志武成十告見令繕寫四體字俟繕寫完竣再行發  
交和琳酌量於 聖祖御碑之旁豎立或另相地勢建蓋碑亭以  
昭武功而垂久遠 御製十全記曰昨准廓爾喀歸降命凱旋班  
師詩有十全大武揚之句蓋引而未發茲特敘而記之夫記者志  
也虞書朕志先定乃在心周禮春官掌邦國之志乃在事旅獒志  
以道甯則兼心與事而言之然總不出夫道得其道乃能合於天  
以冀承乎貺則予之十全武功庶幾有契於斯而可志以記之乎  
十功者平準噶爾爲一定回部爲一掃金川爲二靖臺灣爲一降



緬甸安南各一卽今二次受廓爾喀降合爲十其內地之三叛么  
磨弗屑數也前己酉廓爾喀之降蓋因彼擾藏邊界發偏師以問  
罪而所遣鄂輝等未宣我武巴忠乃遷就完事致彼弗懼而去歲  
復來以致大掠後藏飽欲而歸使長此以往彼將占藏地嚇眾番  
全蜀無甯歲矣是以罪庸臣選名將勵眾軍籌儲餉福康安等深  
感朕恩弗辭勞苦於去歲冬月卽率索倫四川降番等精兵次第  
由西甯冒雪而進今歲五月遂臨賊境收復藏邊攻克賊疆履綫  
險如平地渡溜要若蹶躅繞上襲下埋根批吭手足胼胝有所弗  
恤七戰七勝賊人喪膽及兵臨陽布賊遂屢遣頭人匍匐乞降將  
軍所檄事件無不謹從而獨不敢身詣軍營蓋彼去歲曾誘藏之  
噶布倫丹津班珠爾等前去故不敢出也我武旣揚必期埽穴犁  
庭不遺一介亦非體上天好生之意卽使盡得其地而西藏邊外

又數千里之遙所謂不可耕而守者亦將付之他人乃降旨允降班師以藏斯事昔唐太宗策頡利曰示之必克其和乃固廓爾喀非頡利之比番邊殊長安之近彼且乞命願恩准之不暇又安敢言和平然今日之宣兵威使賊固意求降歸順實與唐太宗之論有所符合昔予記土爾扈特之事於歸降歸順已悉言之若今廓爾喀之謝罪乞命歸降歸順蓋並有焉以其悔過誠而獻地切也迺知守中國者不可徒言偃武修文以自示弱也彼偃武修文之不已必致棄其故有而不能守是亦不可不知耳知進知退易有明言予實服膺弗敢忘而每於用武之際更切深思定於志以合乎道幸而五十七年之間十全武功豈非 天貺然 天貺逾深予懼益切不敢言感惟恐難承兢兢皇皇以俟 天眷爲歸政全人夫復何言○辛未諭軍機大臣等福康安等奏官兵撤回見在

協布嚕地方一摺覽奏欣悅前此大兵深入賊境賊匪兩次令奸細暗中窺伺幸而福康安等於軍營後路嚴密巡防奸細即時拏獲其東覺窺探賊人亦經官兵放槍擊退是以震懾聲威望風膽落於屢次剿殺之後卽畏威悔罪再四籲懇投誠真心悃伏告福康安等所辦周到深爲可嘉除該卡兵已經福康安等獎賞外其首先盤獲之王大倫竟著以千總用並送部引見東覺一路擊退窺探賊匪之侍衛色玉慎業經福康安等奏升二等侍衛仍著賞段一匹以示獎勵至協布嚕地方拏獲奸細該賊匪始猶捏名狡供因令前獲賊目崗噶勒塔則西認識質證無從狡賴始據供吐實情是崗噶勒塔則西尙知畏法不敢庇其黨與福康安等曾否酌量賞給是否已經遣回或已起解之處並著福康安查明具奏尋奏崗噶勒塔則西在軍營甚爲出力屢經酌賞見在廓爾喀投

誠該賊目不便遣回應請解京入於健銳營降番佐領下安插且其人頗通廓爾喀文義即可令其在京教習以備通譯得旨是○壬申諭穆精阿熟諳刑名調任吏部以來亦屬勤慎今患病溘逝著加恩賞給銀二百兩以示軫卹所有吏部右侍郎員缺著額勒春調補其所署明興之刑部右侍郎事務著松筠兼署○癸酉諭阿迪斯在鑾儀衛行走止屬照常供職念伊係大學士阿桂之子阿桂年逾七十阿迪斯著加恩補授戶部侍郎仍兼鑾儀衛使行走以示體恤○諭原任大學士范文程在國初時勲庸懋著其子范承謨又殉難捐軀今伊裔孫內見無文職大員殊堪軫念所有鄒奕孝工部左侍郎出差員缺著加恩以范宜恆署理○丙子諭軍機大臣等濟甯地方於八月十六七等日連次降雪已至尺許况今年節氣較早月內卽恐封山是以朕早經慮及降旨令福康

安等於受降後卽速撤兵茲大兵已於九月初間全抵濟甯此時  
自已早至前藏不至有凍阻之虞朕心始爲稍釋此次廓爾喀不  
特備物輸誠向福康安等軍營呈送牛羊酒米等物備犒官兵卽  
成德一路亦呈送牛羊米食等項可見其真心懃服恭順實出至  
誠福康安等所奏酌留兵一百餘名在熱索橋暫駐之處竟可不  
用至所稱廓爾喀貢使已派侍衛珠爾杭阿等於九月初三日帶  
同起身計算該貢使起程日期距臘底尙有一百十餘日儘可趕  
到其所進貢品內馴象番馬本令緩程行走其餘沈重物件昨已  
有旨令福康安酌減隨後送京以便貢使遄行但樂工一項必須  
隨貢使一同趕到庶年節宴會使朝覲各國共聆異方傑侏更足  
以備太常而昭武烈福康安等摺內止稱該貢使及隨從人等起  
身日期而於樂工是否可偕貢使於年內到京之處未經敘及著

傳諭福康安如樂工係隨貢使同行則已若係落後卽著孫士毅和琳於該樂工行抵何處卽另派妥員飛速伴送以便與貢使一同於年內到京方爲妥善至此次藏內用兵烏拉一切皆係發帑給價並未絲毫累及商上而各番寨經兵燹之後元氣未能驟復福康安請將應納錢糧酌免一二年所見甚是但向來駐藏大臣類多闕冗一切置之不問不過三年閒住得潤囊橐班滿卽可回京惟聽達賴喇嘛親近及噶布倫等擅行並不關白駐藏大臣以致任意妄爲屢滋釁端今經和琳到彼實力整頓諸事日有起色並將噶布倫俱由駐藏大臣從公揀選奏請補放是藏內要務俱聽駐藏大臣主事一整從前積習今酌免錢糧修葺官寨二事俱關緊要自亦應駐藏大臣督辦若僅告知達賴喇嘛恐其見小糊塗難保其必能遵行妥辦此二事均交和琳等查明辦理俾事權

益歸畫一更足以收實效而資整理又據和琳奏廓爾喀所遣噶  
箕人等親至布達拉謝過一切應酬對答必須詞嚴義正方足以  
服其心等語此爲最要前據福康安等奏該貢使於過藏時謁見  
達賴喇嘛並呈送哈達土物已有旨令和琳告知達賴喇嘛班禪  
酌量收存加倍酬給回賞不可爲廓爾喀所輕今和琳恐達賴喇  
嘛不諳事體於接見貢使時應對失當趕回前藏指教達賴喇嘛  
所見與朕指示相同但稱俟貢使起身後再迎往前途督辦此可  
不必見在大兵已撤後藏一帶皆經和琳籌辦妥協無須迎往此  
時當在前藏駐紮與福康安孫士毅惠齡會商善後各事不必再  
往後藏以省跋涉○乙酉諭軍機大臣等郭世勳等奏據洋商蔡  
世文等稟有英吉利國夷人噉喇亞晚噴啞等來廣稟稱該國王  
因前年大皇帝八旬萬壽未及叩祝今遣使臣嗎嘎噶呢進貢由

海道至天津赴京等語並譯出原稟進呈閱其情詞極爲恭順懇摯自應准其所請以遂其航海嚮化之誠卽在天津進口赴京但海洋風帆無定或於浙閩江蘇山東等處近海口岸收泊亦未可知該督撫等如遇該國貢船到口卽將該貢使及貢物等項派委妥員迅速護送進京毋得稍有遲誤至該國貢船雖據該夷人稟稱約於明年二三月可到天津但洋船行走風信靡常或遲到數月或早到數月難以豫定該督撫等應飭屬隨時稟報遵照妥辦再該貢船到天津時若大船難以進口著穆騰額豫備小船卽將貢物撥運起岸並派員同貢使先行進京不可因大船難以進口守候需時致有耽延也將此傳諭各督撫並諭郭世勳盛佳知之○丙戌諭刑部奏直隸省拏獲盜犯曹先等分別斬梟一案此案楊際春陳祥主僕二人均被車夫吳洛全等謀害殊堪憐憫所失



銀兩於獲犯後經官追起亦屬有名無實所有吳洛全車輛馬匹  
卽應一併給與事主家屬領回該部何必按例稱變價入官該督  
原請將車輛馬匹入官之處辦理亦覺鄙吝嗣後凡有盜竊各案  
其查出盜賊名下財物俱給與事主收領不必入官著爲令○諭  
軍機大臣等和琳奏查出五十五年廓爾喀遣人至藏曾有謝恩  
表章貢物及各信字物件等項一摺此事大奇我國家綱紀肅清  
朕臨御以來一切政務無不躬親綜理而大小臣工凡遇地方事  
件亦無有不據實陳奏候朕裁奪從未有敢於匿不上聞者今閱  
廓爾喀表文因其貢使受恩回國特差頭目親齎表貢謝恩情辭  
至爲恭順並無討要俸祿地方之語其稟請銀錢一事亦屬無關  
緊要倖習渾等縱不知事體輕重卽爲討好起見亦應據情代奏  
又何所顧忌而匿不上聞卽云伊信字中有要照大人們所許的

話行事等語自卽係指巴忠等前此在藏許給銀兩之事若果於  
普福俘習渾等有所干涉或心存畏懼自思迴護不敢上聞尙屬  
情理所有今許給銀兩之事係巴忠鄂輝成德三人所辦與俘習  
渾普福等毫無干涉又復何所瞻顧竟將表文貢物等項壓閣不  
奏專擅糊塗竟至不解實屬可恨凡內地事件隱匿不奏一經發  
覺卽當按律治罪況邊外重務竟敢壅於上聞則何事不可爲此  
而不嚴行查辦何以肅政治而飭官常見令阿哥等同軍機大臣  
將普福嚴加刑訊據供五十五年七月內鄂輝說及廓爾喀曾有  
人來藏帶了珊瑚刀子等物還有表文說要進貢並有給大人們  
信件因見表文係屬底稿且又並無正經頭人到來已駁回叫他  
另換正經表文貢物等語此話我曾告訴過雅滿泰嚴廷良其雅  
滿泰曾否告知俘習渾不得知道等語據普福所供是此事竟係

鄂輝隱匿不奏雅滿泰既經普福告知俘習渾自亦必與聞何以  
伊三人扶同隱匿並不具奏此時福康安等均已齊集前藏鄂輝  
亦卽日可到著福康安孫士毅惠齡和琳卽將鄂輝革職同俘習  
輝雅滿泰嚴切刑訊令其據實供吐是何意見迅速具奏毋任稍  
有遁飾至前次私許銀兩一節諒係巴忠一人主見辦理今閱廓  
爾喀所寄信字及呈送物件鄂輝成德及穆克登阿張芝元俱有  
信物寄給獨無與巴忠信字可見巴忠前次在藏心懷巧詐辦理  
此事雖伊一人主見而暗中指使關說全不露伊名字卽廓爾喀  
亦不使聞知以爲日後敗露伊轉可置身事外居心詭譎更屬可  
惡可恨若使其身尙在必當明正典刑今先已自斃法無可加見  
在傳知該旗所有巴忠子孫除伊子僧格布前已革去官職挑補  
護軍效力當差外其孫輩不准出仕以爲取巧誤公者戒至穆克

登阿張芝元係前赴邊界之人於許銀說和之事斷難諉爲不知姑念伊二人係爲巴忠等差遣前往聽從辦理非創意者可比此時亦不復深究其巴勒布商人巴特巴第收存廓爾喀表章貢物等件不敢擅動一經和琳傳詢卽行呈出尙屬可嘉著和琳傳旨賞給銀一百兩示獎至普福係和珅保舉之人和琳並不因伊兄所薦稍存迴護據實查奏甚爲公正著賞給御用玉搬指一箇大荷包一對小荷包四箇以示獎勵又據和琳奏查辦沙瑪爾巴親屬請將其親姪樂繼建本等三犯照大逆緣坐律擬斬其堂姪阿里等男女大小七名口應否發往煙瘴地方安插抑賞給功臣爲奴等語藏內人等不諳緣坐條例所有沙瑪爾巴親姪樂繼建本等三犯竟著解京交部治罪其阿里等七名口卽交四川總督分發兩廣福建煙瘴地方安插不必解京○戊子諭軍機大臣等福

康安等奏遵旨受降撤兵回藏及廓爾喀懾遵約束情形一摺覽  
奏欣慰廓爾喀傾心向化備具表貢懾遵約束並恭撰番字歌詞  
呈進極爲恭順藏局實爲完善至福康安等奏接到拉特納巴都  
爾稟稱從前因銀錢啓釁嗣後不再提一箇當兩箇箇半行使之  
語以表其誠心改悔廓爾喀與唐古特人等交通貿易由來已久  
前因此事易啓爭端是以有旨令福康安等諭知廓爾喀竟應停  
止貿易以杜葛藤今聞廓爾喀地方需用食鹽酥油等項斷不可  
缺與俄羅斯之需用大黃相同藏內亦需彼處米石今廓爾喀業  
經歸命投誠若停止貿易轉非懷柔綏輯之意但從前廓爾喀與  
藏內交易俱係伊等自行說台並無官爲經理以致噶布倫從中  
牟利叢滋弊端今因俯示體恤准其仍通買賣所有貿易等事竟  
應官爲辦理不准噶布倫等復行私自講說一切事宜應比恰克

圖之辦理俄羅斯交易更爲嚴密或於一歲中酌定兩次四次准其通市於撫輯之中予以限制駐藏大臣仍不時稽查親加督察令彼此公平交易毋得稍有偏枯既可遂其恭順之心又可免噶布倫等從中滋弊至廓爾喀與藏地交易自不能不行使銀錢見據廓爾喀呈稟此後不敢再提一箇當兩箇箇半之說是該處銀錢亦可公平定價不至再有爭執此事著交福康安等四人會同詳定章程並明白曉諭廓爾喀及唐古特人等永遠遵奉又據奏查明承勦重光白參革後尙知奮勉等語已降旨將重光開釋枷號與承勦於軍務完竣後一體送部引見至鄂輝於運糧重務任其積壓固有應得之咎姑念伊係總辦之員彼時又赴番拉木一帶查值勢難並顧且沿途督運糧石俱係番民非內地民人可比該運員等在途積壓尙非有心玩誤承勦重光俱已加恩寬免是

鄂輝之不能督催糧運其罪尙輕而於廓爾喀五十五年呈進表貢匿不具奏一事鄂輝之罪實在於此前次許給銀兩一節鄂輝尙可推諉巴忠以伊通曉番語其事係一人主持辦理今此事見據普福供明係鄂輝親向普福告知於廓爾喀遣人來藏呈遞表貢時經鄂輝駁回更換並經普福勸伊據情轉奏而鄂輝並未聽從是此事竟係鄂輝隱匿不奏更不能藉詞諉卸著福康安等遵照昨旨卽將鄂輝革職嚴切根訊令其據實供吐具奏諒福康安等不敢爲之開脫見今俘習輝雅滿泰二人在藏皆可質審諒伊等亦不肯代人認罪也見在藏內應辦善後事宜最關緊要節經有旨令福康安四人會同商辦務須事事盡善詳定章程以期經久無弊今賞福康安洋表一箇大荷包一對小荷包四箇海蘭察孫士毅惠齡和琳洋表各一箇大荷包各一對小荷包各二箇又

初次鮮鹿肉二十塊並著賞給福康安等四人及隨從辦事出力官員分嘗以示眷注○辛卯諭昨因陸有仁於所屬盜殺重案並不確查究辦率行據詳覆轉已降旨照部議革任本屬咎所應得第念陸有仁由刑部司員出身於刑名事件尙能諳習且人亦明白其才尙不至終於廢棄所有直隸布政使業將鄭製錦補授其所遺甘肅按察使員缺卽加恩著陸有仁補授仍帶革職留任四年無過方准開復該員益當自知感奮於所屬刑名重案悉心詳審毋再任聽屬員草率朦混致干咎戾○諭軍機大臣等福康安等奏查出上次廓爾喀謝恩表貢見在尙存前藏此事早經和琳奏到當令阿哥等同軍機大臣將普福刑訊據普福所供乃係鄂輝隱匿不奏實在大奇早有旨將鄂輝革職交福康安等提同俘習渾雅滿泰嚴切質訊今福康安所奏亦以此事爲鄂輝所深知



何以隱匿不奏應切實辦理與前降諭旨相合見又據普福續供與雅滿泰聯銜具奏之摺係鄂輝辦的鄂輝說我可不必列銜並云俟其起身後再奏其嚴廷良到藏日期亦可寫遲幾日等語是鄂輝竟豫爲地步故令普福等具奏時將嚴廷良到藏日期填遲數日以便發覺後藉詞起身在前貢到在後諉過於普福雅滿泰等尤出情理之外此時福康安等均已齊集前藏而鄂輝俘習渾雅滿泰嚴廷良亦皆在彼無難四面質證著再傳諭福康安等務當遵照前旨卽提鄂輝嚴切根究令其據實供吐此事在五十五年成德雖未赴藏但許給廓爾喀銀兩時成德亦同在彼廓爾喀旣寄信索取經鄂輝壓閣不辦鄂輝回至成都後斷無不告知成德之理朕聞成德於上次派往辦理廓爾喀時因鄂輝巴忠主持說和成德尙以帶領多兵應行打仗不當與之說和與巴忠等爭

執以致意見參差其卒歸於說和完事者自因鄂輝巴忠一係將軍一係欽差成德職分在伊二人之下不得不隨同辦理而此事之原委成德必知其詳著福康安再向成德嚴切詰訊反復開導務使將說和一事係何人主見和盤托出若再代爲隱瞞卽屬喪盡天良成德自問當得何罪○癸巳定旗人犯竊子孫削籍爲民例

十一月甲辰諭朕偶閱錢珪蔡珽列傳錢珪爲御史時參劾山西巡撫穆爾賽貪婪暨條陳各款似有風裁及用至巡撫輒於所屬知縣婪贓之事聽受私書徇情銷案不能自踐其言蔡珽曾極陳年羹堯貪暴忤擢總督乃挾嫌誣陷岳鍾琪田文鏡袒護黃振國以致獲罪問擬重辟而傳內於伊二人身故俱書爲卒體例皆未允協國史所以傳信一字之褒貶卽關其人終身之優劣義例綦

嚴夫人臣立品無訾有始有終者方得謂之爲卒錢珏之言行不  
符蔡珽之朋比取戾安得謂之始終無玷若伊二人得書爲卒其  
與立朝本末粹然者何以示區別錢珏蔡珽傳末均著改書爲故  
嗣後除特行予諡及入祀賢良祠者自當書卒外其雖無飾終之  
典而品行克保厥終者仍一例書卒若初終易轍營私獲罪之人  
傳末止當書故不得槩書爲卒著國史館總裁卽查明列傳確覈  
人品事實如有似此者均改正書故用昭彰瘴已改未改陸續開  
日以四本傳爲率繁簡錯綜送看○諭各省駐防滿洲兵無嗣入  
官田畝仍賞該營養贍孤寡著爲令○丙午諭軍機大臣等前降  
諭旨令將扎什倫布商上每年所得羨餘分給前藏所管唐古特  
番兵俾資貼補原因扎什倫布商上素屬豐裕而派往後藏唐古  
特兵丁係爲保護班禪而設是以酌爲調劑令將盈餘分給前藏

兵丁共需餘潤同心固守之義今據福康安等奏該處商上自經  
兵燹之後迥不如前一時元氣未能驟復自不必強其分給所謂  
彼一時此一時也且朕聞班禪額爾德尼年雖幼小人竟聰慧勝  
於達賴喇嘛自由前輩班禪實非常人故其慧性不泯茲觀其於  
福康安經過後藏時跪請朕安呈遞佛像哈達並以此次派兵進  
討全爲振興黃教起見專差喇嘛進京恭進表貢謝恩情詞極爲  
懇摯又據福康安等奏薩嘉呼圖克圖於福康安等經過時亦呈  
遞佛像哈達一併進呈等語前因撒迦溝人數眾多而該喇嘛又  
有捐辦糴粃牛隻之事尙知畏法奉公已屢降諭旨令福康安等  
傳知該喇嘛准其照舊焚修毋庸遷徙今福康安等察看情形並  
未將初次欲行查辦之意向其宣露所見甚是自應如此辦理惟  
達賴喇嘛親族管事最易滋弊此必當嚴禁昨已降旨令和琳堅

持定力加意經理和琳此次在藏實力整飭釐剔積弊朕得之意  
外實在可嘉至軍需銷算事宜自應令和琳會同覈辦藏內善後  
諸事經福康安等公同酌定後俱已立法可行無須和琳專駐該  
處辦理其前後藏一切軍需條款和琳原不妨往來查覈所有應  
行銷算事宜自察木多以西著交孫士毅和琳惠齡三人會同覈  
實報銷察木多以東著交孫士毅與惠齡會辦如此則和琳既可  
兼辦報銷而藏務亦能就近查察實爲兩有神益再阿旺簇勒提  
木遺有廟宇財產若無安人管束恐其徒眾覬覦生心互思攘奪  
滋生事端前據俘習渾等奏將該喇嘛徒弟建巴多布丹作爲扎  
薩克喇嘛管理廟務徒眾當經允准但其人是否妥協並著和琳  
留心察看如建巴多布丹尙能管束則已否則或商之達賴喇嘛  
另於別廟喇嘛內揀擇一人作爲堪布令其掌管免致滋事方爲

妥善又前發去金奔巴瓶原爲籤掣呼畢勒罕之用但不必俟該處大呼圖克圖轉世方行試用或見在藏內不拘何呼圖克圖應出呼畢勒罕即可將金奔巴瓶先行籤掣如此辦理數次定爲章程後該處僧俗人等共相遵奉將來遇有大呼圖克圖轉世照此掣籤更可堅眾人崇信之心而從前私相傳襲積弊亦可不動聲色藉以革去○庚戌定武職改歸原籍不准升遷寄籍例○壬子諭軍機大臣等福康安等奏稱行抵前藏將善後章程大意告示達賴喇嘛察看達賴喇嘛感戴出於至誠一切惟命是聽斷不敢稍形格礙等語朕節次所示條款內如嚴禁達賴喇嘛左右近侍親族及噶布倫等干與滋事並發去金奔巴瓶籤掣呼畢勒罕各款皆係保護黃教去彼世襲屬託私弊達賴喇嘛自當一一遵奉此係極好機會皆賴 上天所賜福康安等當趁此將藏中積習

漸除一切事權俱歸駐藏大臣管理俾經久無弊永靖邊隅方爲妥善又據奏達賴喇嘛告稱此次官兵進剿廓爾喀收復邊境衛藏得以甯輯實深歡感卽日專差喇嘛赴京進表謝恩等語前據福康安等奏班禪額爾德尼感激朕恩懇請差人赴京齎進表貢今達賴喇嘛亦有此請自可與班禪額爾德尼所遣喇嘛一同來京計此旨到日福康安恐已在前藏起程著傳諭和琳於班禪額爾德尼貢使到前藏時卽令與達賴喇嘛所遣之人一同赴京不必分作兩起亦不必多派喇嘛止須前後藏各差堪布一人齎送表貢沿途行走較爲便捷再向來藏內出呼畢勒罕俱令拉穆吹忠降神附體指明地方人家尋覓其所指呼畢勒罕不止一人找尋之人各將所出呼畢勒罕生年及伊父母姓名一一記明復令拉穆吹忠降神禱問指定真呼畢勒罕積習相沿由來已久朕思

其事近於荒唐不足憑信拉穆吹忠往往受人屬託假託神言任意妄指而藏中人等因其迹涉神異多爲所愚殊屬可笑此等拉穆吹忠卽係內地師巫多以邪術惑人耳目聞拉穆吹忠降神時舞刀自扎身體無害是以人皆信之此等幻術原屬常有但卽使其法果眞在佛教中已最爲下乘若使虛假則更不值一噓其妄誕不經豈可仍前信奉福康安等見在整飭藏務正應趁此破其積弊莫若在藏卽令拉穆吹忠各將其法試演如用刀自扎等項果能有驗則藏中相沿日久亦姑聽之若福康安親加面試其法不靈卽當將吹忠降神荒唐不可信之處對眾曉諭俾俗人等共知其妄勿爲所愚嗣後出呼畢勒罕竟可禁止吹忠降神將所生年月相仿數人之名專用金奔巴瓶令達賴喇嘛掣籤指定以昭公允再此次福康安統兵進剿廓爾喀如能直抵陽布將拉特



納巴都爾巴都爾薩野悉數生擒解京獻俘其土宇分給附近各部落克奏膚功該處係邊外荒徼非如金川等可比福康安果能擣穴擒渠厥功甚大前代功臣原有身非宗室晉封王爵之例朕本擬俟紅旗遞到加封王爵以昭異數今因廓爾喀畏罪投誠十分恭順而藏內又復氣候早涼恐爲雪阻福康安等遂傳旨受降班師藏事是以止將福康安賞給世職海蘭察原有公爵晉封一等不克副朕初願然由今思之似此受降藏功未始非 上天嘉佑我君臣之意蓋福康安係 孝賢皇后之姪大學士傅恆之子如果能成鉅功或可晉封王爵在朕止以其勛勞甚大用示酬庸而天下無識之徒或謬議朕厚於后族破格施恩傳之後世亦且以爲口實幾與漢唐之寵任外戚者無異朕將何以自解而福康安父子兄弟多登顯秩福康安又荷王封富察氏一門太盛於伊

家亦屬無益但福康安既成大功朕又不得不加以殊恩轉覺兩難茲如此竣事諸臻完善朕既免加恩后族之嫌福康安亦無盛滿難居之慮雖不克副朕初願而計慮及此較之蕩平廓爾喀地方倍爲欣慰也惟是福康安此次跋涉險阻備嘗艱苦且調度有方使廓爾喀震懾威稜誠心向化可期永靖邊隅僅予世職尙不足以酬勞勩除已明降諭旨將福康安授爲領侍衛內大臣俟福康安回京赴兩廣總督任時仍令阿克東阿署理外但念福康安之兄福隆安因尙公主例有護衛等官職自公主薨後福隆安又已身故其例得護衛翎頂俱經裁撤福康安將來在總督任內僅有千把等官跟隨不足以示寵異業已降旨照王公名下親軍校之例賞給六品頂帶藍翎三缺令福康安於伊得力家人內酌量給戴用昭格外加恩優眷勞臣至意○癸丑弛貧民出關禁○乙

卯命督撫於殺死一家二命以上重案專摺奏聞○丁巳諭軍機大臣等昨據侍衛安祿等將丹津班珠爾等解到當令軍機大臣詳悉詢問其所供許銀說合各情節大略俱已明悉前此藏內兩次滋事皆由達賴喇嘛諸事惟聽左右近侍親族及噶布倫等專擅率意徑行以致屢生事端向來噶布倫缺出達賴喇嘛皆於東科爾家道殷實內挑補往往貽誤公事噶布倫係承辦藏務之人必須論其才幹能否辦事方可拔補豈得專取世族及家貲豐裕者濫行補用若不論其才否而輒以世家富戶充補是猶內地世族鹽商大賈俱可擢用顯秩有是理乎前已節次降旨遇有噶布倫缺出令駐藏大臣與達賴喇嘛秉公揀選奏請補放惟視其才具之優長不在世族家道之貧富方爲公當但此次噶布倫見在詢之丹津班珠爾俱稱每年並無得項惟商上給與糈粃酥油等

項亦無定額其噶布倫內有官爵職銜者向由理藩院發給銀兩俸段等語噶布倫等既在藏辦事豈無用度其有官爵職銜者每年止藉商上酌給糈粃酥油該噶布倫等或藉稱用度不敷借端婪索皆所不免立法未爲允協福康安等當商之達賴喇嘛或於商上空閒地畝內酌量撥給所收稞麥分給若干作爲定額如回疆阿奇木伯克之例俾該噶布倫辦公有資無可藉口自酌定得項後如噶布倫等再有借端婪索之事即可將伊治罪示懲辦理方爲妥善再藏內設立噶布倫四缺原俱係從民人內挑補嗣經班第奏明參用喇嘛一人由商上畢七克齊四人內擇其有才具者充補但此等喇嘛噶布倫訊據丹津班珠爾稱不過管理達賴喇嘛零星事件其藏內應辦事件俱係番民挑補之噶布倫管理等語是噶布倫喇嘛一缺並不得力而該喇嘛與達賴喇嘛親近

易於進言若達賴喇嘛能知大體尙不至爲其所惑如係庸懦無識者惟其言是聽遇有缺出卽可將伊親族徇私充補諸弊叢生似於藏務無益見在喇嘛噶布倫一缺已據孫士毅和琳奏明照例將扎薩克喇嘛建巴多布丹補授此時亦無庸更換俟將來該喇嘛噶布倫出缺時竟當於番民內挑補將喇嘛充當噶布倫之處永遠停止以上二條著福康安等於辦理善後章程內一併議入又前次福康安等將廓爾喀繳回扎什倫布物件開單進呈當交軍機大臣分別解京變價及留給駐防兵丁經費並給還扎什倫布各款發交福康安等照辦今思濟隴等處既不駐兵無需經費且廓爾喀前搶扎什倫布物件除零星拋散及伊手下人等隱匿外見在繳回之物不過十分之一此次軍務所費帑金不下鉅萬亦何必計此區區耶著傳諭福康安等除已解京外所有元寶

銀器俱著賞還班禪商上其應行變價者亦毋庸變價同段匹等物一併賞還扎什倫布聽其料理以示體恤再丹津班珠爾扎什敦珠布從前向廓爾喀許銀說和原有應得之罪但念伊人尙明白今事屬既往不加深究應俟年班遞丹舒克堪布喇嘛回藏時卽令伴送之員帶回藏內惟是丹津班珠爾被廓爾喀裹去在陽布居住年餘難保無屈體懇求等事到藏後斷不可再令充當噶布倫俟數年後無過或令充當第巴等缺尙屬可行著交和琳等存記留心酌辦又聞福康安等前次所奏拉特納巴都爾呈出之原立合同內有每年唐古特人前往陽布朝塔抹拭白土一節見在辦理善後事宜此事竟可永行停止又所有唐古特與廓爾喀交通貿易之前已有旨交駐藏大臣官爲經理限定次數不得任聽私自交易前因廓爾喀既已悔罪投誠令福康安等於善後

事宜內許其仍通貿易官爲經理每年或分作四次或兩次交易  
今思此事不可遽行允准福康安等於廓爾喀乞降時應俟其再  
四懇求開市方行允許庶可以斷葛藤而杜弊端

十二月庚午諭福康安等奏酌定唐古特番兵訓練事宜藏內鼓  
鑄銀錢各摺所稱新設番兵經費止須商上給番目錢糧二千六  
百餘兩其餘俱係以沙瑪爾巴仲巴貲產及丹津班珠爾家繳出  
之項支給等語此項查抄沙瑪爾巴仲巴貲產並丹津班珠爾繳  
出莊田自應一律歸入達賴喇嘛商上作爲新設番兵經費之用  
但廓爾喀與唐古特滋事之由皆因前次噶布倫索諾木旺扎勒  
於貿易時從中剋扣私加稅銀經廓爾喀呈訴彼時留保住慶麟  
等隱匿不奏噶布倫索諾木旺扎勒畏罪服毒身死雖已降旨將  
伊扎薩克台吉職銜革去不准伊子承襲但其家產尙未查出歸

入達賴喇嘛商上該噶布倫係首先起釁之人若任其子孫坐享豐廩不足以示懲儆且其罪重於丹津班珠爾著福康安等將索諾木旺扎勒所有家產逐一查明同沙瑪爾巴等田莊貲產一律歸入商上此項財產止應以公濟公作爲新設番兵三千名每年經費之川其另摺所奏於察木多等處抽撥兵六十名撥調守備二員把總一員外委二員在江孜定日等處駐紮巡查所有例給換防之費原係綠旗官辦仍照例官爲支給不必用其商上之項再所定藏內鼓鑄銀錢章程亦止可如此辦理藏內既不產銅所需鼓鑄錢文銅斤仍向滇省採買自滇至藏一路崇山峻嶺購運維艱自不若仍鑄銀錢較爲省便但閱所進錢模正面鑄乾隆通寶四字背面鑄寶藏二字俱用唐古特字模印並無漢字於同文規制尙爲未協所鑄銀錢其正面用漢字鑄乾隆寶藏四字背面



用唐古特字亦鑄乾隆寶藏四字以昭同文而符體制已另行模繪錢式發去遵辦○乙亥諭本日召見盛京戶部侍郎祿康清語平常一切事件未能明白陳奏盛京戶部事務較繁祿康恐不能勝任著調補盛京兵部侍郎所遺盛京戶部侍郎著伯麟調補○丙子諭福崧著來京候旨所有浙江巡撫員缺著長麟調補向來山西巡撫係兼提督職銜用武職頭品頂帶補服今長麟調任浙江著加恩仍帶一品職銜並准用文職補服蔣兆奎著補授山西巡撫所遺山西布政使員缺著善泰補授其山西按察使員缺著祖之望補授○諭軍機大臣等全德參奏運使柴楨將商人王履泰等應納錢糧在外截留作爲已收私自移用共二十二萬兩庫官黃德成會稟請該運使明示因柴楨告以急用暫那當卽設措歸款黃德成隨聽其作弊又隨訊之該運使家人柏順供稱實因

柴楨浙江交代未清恐浙省參奏是以私那十七萬兩前往補填其餘五萬係自己侵用等語此事大奇殊出情理之外已明降諭旨將柴楨革職拏問並將該庫官黃德成革職交書麟奇豐額全德嚴審定擬矣柴楨以貴州舉人用至運司其前任浙江鹽道卽係美缺迨調用兩淮缺分尤好該員以邊省寒峻坐享豐贍亦當知足安分謹守出納何得將商人應交錢糧私自那移至二十二萬之多卽據伊家人供稱該員自用銀止五萬兩其餘十七萬兩係送往浙江補填交代柴楨調任兩淮未久何以卽用銀五萬兩且浙江鹽道養廉亦厚又何以交代未清多至十七萬兩種種情節殊堪駭異除另降諭旨交福崧在浙省就近查明明白回奏並令馮光熊於該員本籍一併查封外著傳諭書麟奇豐額接奉此旨卽速赴揚州同全德將該員因何那移作何支用會同確切查

訊務得實情書麟辦事素賴此係特交查辦之件尤宜秉公確查  
據實辦理不得稍涉迴護如該員實係侵蝕入己見距年節不遠  
著傳旨卽將該員一面正法一面奏聞以爲運使大員侵帑不法  
者戒至柴棧見經全德摘取印信派員看守如該員有聞風畏罪  
自戕等事則惟書麟奇豐額全德三人是問恐書麟等不能當此  
重戾其庫官黃德成雖係微末之員但典守者不得辭其責因何  
任令該運使私自那移不行申報亦應訊明治罪全德雖經查明  
參奏第近在同城不能先事覺察致令那移至二十餘萬之多亦  
有應得之咎統俟定案後再降諭旨○免伊犁回民本年額穀○  
辛巳調王懿德爲江西布政使以顧長祚爲浙江布政使調聞嘉  
言爲浙江按察使以林僑爲四川按察使○禮部尙書紀昀等奏  
向來考試春秋用胡安國傳胡傳中有經無傳者多可以出題之

處甚少胡安國當宋南渡時不附和議借經立說原與本義無當  
聖祖仁皇帝欽定春秋傳說彙纂駁胡傳者甚多 皇上御製

文亦多駁其說科場試題不應仍復遵用請嗣後春秋題俱以左

傳本事爲文參用公羊穀梁卽自下科鄉試爲始一體遵行得旨

此奏是○癸未改貴州凱里等協管邊缺爲內地○乙酉以錢受

椿爲福建按察使

由糧道遷

○庚寅諭前據全德參奏運使柴楨一案

當卽降旨令福崧將柴楨在鹽道任內因何虧空離任時作何交

代之處據實明白同奏茲據覆奏柴楨在鹽道任內有濫支商捐

銀兩及經管變價物件微損短交自認照數賠繳已據護鹽道明

保催收清楚其接任鹽道張愼和亦經結報無虧等語所奏實大

乖謬福崧以巡撫兼管鹽政於柴楨虧空庫項至十七萬之多豈

竟毫無聞見况見經書麟等訊據柴楨供認屬實福崧何得藉詞

支飾乃摺內並未將鹽庫因何虧短緣由據實查出猶復意存推卸而於柴楨私那虧缺福崧平日漫無覺察之處覩顏若無與己事並不自請治罪則所司何事殊屬昧良負恩福崧前已降旨革職著卽拏問交慶桂長麟秉公確訊歸案辦理如有與柴楨通同染指情弊卽據實嚴參勿稍徇隱○辛卯諭軍機大臣等福康安等奏審訊壓閣廓爾喀表貢匿不具奏一摺鄂輝於許給廓爾喀銀兩一事或尙可諉爲不知至五十五年廓爾喀呈進表貢壓閣不奏見經福康安等面加詰訊鄂輝雖展展轉支飾而此事係其主見已屬百喙難辭今福康安等並未按律定擬請將鄂輝等解京治罪試思解到後卽交軍機大臣覆訊明確亦不值卽將伊三人梟行立寘重典若交部監禁是伊等身獲重譴轉藉此回京安坐固固殊不足以示儆計此時鄂輝起解在途亦距藏不遠著傳諭

惠齡英善接奉此旨飛飭沿途不拘鄂輝解到何處卽於該處截  
留仍解回前藏交與和琳將伊永遠枷號與俘習渾雅滿泰同爲  
在藏辦事大臣不肯用心妥辦致藏地不靖者戒○大學士兩廣  
總督公福康安等奏欽奉頒發 御製十全記於 聖祖仁皇帝  
御碑之旁豎立恭查 聖祖仁皇帝御碑在布達拉山前爲前後  
藏通衢擬添建碑亭一座礱石爲方碑正面刊國書碑陰刊漢文  
左刊蒙古字右刊唐古特番字報聞○是歲朝鮮安南暹羅廓爾  
喀來貢○會計天下民穀數各省通共大小男婦三萬七百四十  
六萬七千二百七十九名口各省通共存倉米穀四千五百六十  
四萬三千五百五十一石二斗三升九合四勺